

# KAKA MBALA MOSI

## DYAKA, MFUMU



[Dibuundu ke yimba, *Kwikila Kaka*—Mu.] Beto kulumusa bayintu ya beto ntangu yayi. Na bayintu ya beto ya kukulumusa mpe bantima ya beto ya kukulumusa na ntwala ya Nzambi, nsuka ya lukutakanu yayi ya nene, ya jubilé yina beto me kuzwa awa, mpe pene-pene ya Ndinga ya Mfumu, Mu ke kukiyufula, na nkokila yayi, kana bantima ya beto me beba ve samu na kima mosi na Nzambi. Kana ya kele mutindu yina, beto telemisa kaka maboko ya beto na Yandi, mpe beto tuba, tuba kaka, “Yayi kele ndombolo ya munu, Mfumu. Nge zaba.”

<sup>2</sup> Tata ya beto ya Mazulu, tala na yisi ntangu yayi na zulu ya maboko ya beto. Maboko ya bawu na zulu, zola kutuba ti beto ke pesa nyonso ya beto na Nge. Nge zaba yina beto ke na yawu nsatu, Tata, mpe beto ke sambila ti Nge ke pesa bansatu ya beto. Bantangu yankaka yina beto zola kele ya kulutila na bansatu ya beto. Kasi, Tata, Nge ke pesa bansatu ya beto, samu beto lenda lomba yawu na lukwikilu. Nge silaka ti Nge ke sala yawu. Na Nkumbu ya Yesu Klisto, mu ke lomba yawu. Amen. Amen.

Ntangu yayi beno vwanda.

<sup>3</sup> Na Mpangi Moore, mpe Mpangi-kento Moore, Mpangi Brown mpe ya yandi, Mpangi Lyle, Mpangi Boutliere, mpe bantu yayi nionso ya mbote awa ya dibuundu, ba-administrateur, ba-diacre, nionso yina ba lendaka vwanda, Kieleka mu ke vutula matondo samu na ntangu yayi ya mbote mpe ntangu ya mbote yina mu me kuzwa awa. Ba-fondateur yayi ya nene yina kwisaka awa bamvula me luta, na bitini ya papié na nsi ya sapatu ya bawu, mpe me pesa ngolo ya munimi ve samu na kunata kisika yayi ya kusambila awa, mpe bantu yayi. Mu banza ti Shreveport fwana pesa mingi na bantu mutindu Jack Moore mpe bantu yayi mutindu yayi kele awa. Na ngolo yina ke lembaka ve mpe ya kukwikama, ba mekaka na kutula kisika yina Nsemo ya Nzambi mpe Luzingu ya Nzambi, lenda kwenda na bantu yina kele na kuzyeta babakala mpe bakento, bayina ke kota mpe ke sepela na balukutakanu. Bika yawu telama ntangu ya yinda, na nkwizulu ya Mfumu Yesu, tii kuna Yandi ke manisa na yawu.

<sup>4</sup> Mpe mu me sepela mingi na mabuundu, mvutu ya beno ya mbote na—na ministere, na Bansangu. Mpe bima ya nene yina Nzambi me sala samu na beto, ya kele kaka yina kele na ndilu ve. Mpe beto ke zaba ata fioti ve yina ya zola kutuba tii kuna beto ke sabuka simu yina yankaka, samu ba me kuna nkuna yina ke kwisa na luzingu na bilumbu na ntwala ya beto. Mpe mingi me

belukaka, mu banza na ntangu yayi zaba kima mosi ve samu na yawu, na manima ya mwa ntangu fioti beno ke mona ti yawu me zimbana. Mpe beto ke mona yawu mingi, ya kele ve kaka yina beno ke mona kusalama; beno zaba ata mbala mosi ve yina ke salama, yina ke salama, mutindu bandandu ya yawu. Mpe mu ke tula kivuvu ti ya—ya ke vwanda ve na bantu ya kulemba yina ke bika lukutakanu yayi, kasi yina bawu kele na lukwikilu ya kulunga na kuzaba ti kusalu me salama, mpe ke vwanda mbote.

<sup>5</sup> Samu na bayina me telemisa maboko ya bawu na Klisto, samu na mbotika ya Mpeve-Santu, mpe bima mingi, mpe bisalu ya lemvo yina beno me zola Nzambi kusala na beno, Mu ke tula kivuvu ti mosi na mosi ya beno ke fuluka na Mpeve-Santu, mosi na mosi. Beno zimbana ve Nsangu ya munu, na zulu ya, *Kidimbu*. Beno fwana vwanda na yawu. Beno bambuka moyo, beno talisa Kidimbu.

<sup>6</sup> Ntangu yayi beto fwana kwenda mbala mosi na Arizona, mpe Yuma, mpe Phoenix. Mpe na yina beto ke vutuka na Sude awa. Mu zaba ve kaka nzila, kaka yina ya kele. Kasi beto ke vwanda awa, mu banza, ya kele dyaka na yisi ya Louisiane, na kutala Ngonda ya zole, kisika mosi awa na Louisiane, mpe na Dallas. Mpe kuna, kuna na Georgie, kuna na kati, mpe kuna na Floride. Mpe na yina beto fwana kwenda na Europe katuka kuna, tii na Ngonda ya sambanu. Mpe na manima beto ke vutuka awa, na Ngonda ya sambwadi mpe na kati-kati ya Ngonda ya nana. Mpe na manima kuvutuka, na yisi ya ntoto, na Amerika ya Sude. . . ve na Amerika ya Sude, na Afrique du Sud. Mpe na kilumbu ya zole ya Ngonda ya yivwa, na nkwizulu yayi ya mvula 1964, kana Mfumu kuzola, beto ke banda na—na Durban, na Afrique du Sud, kisika beto monaka bantu makumi tatu ya mafunda kukwiza na Mfumu, na ntangu mosi. Mpangi Julius Stadskev vwandaka awa, ya vwandaka na lukutakanu na ntangu yina. Mu banza ti ya kele kieleka.

<sup>7</sup> Mpe mu banza ti ba talisaka Mpangi Julius, muntu yina sonikaka buku ya *Profete Mosi Kwisaka Kutala Afrique Du Sud*. Mu ke. . . Mpangi-kento Stadskev, kukondwa ntembe, kele awa kisika mosi kuna. Mu—mu lenda tula yandi kaka ve. . .yinga, yinga, ntangu yayi mu ke sala, mpe bana. Mu ke bambuka moyo, bannvula fyoti me luta, Minneapolis, bawu vwandaka bana ya fyoti; ntangu yayi mu fwana tala bawu, bawu kele mwana-bakala ya nene mpe mwana-kento ya nene.

<sup>8</sup> Mpangi-kento Stadskev awa, ntama mingi ve, yina vwandaka kieleka na ntima ya munu yina vwandaka baluka, mwa mama mosi, yandi zimbisaka bébé ya yandi. Mpe Mfumu vwandaka. . . monaka ya kulunga na kukatula yawu. Mpe yandi bokilaka munu, mpe yandi zolaka. . . Ba zolaka nata munu kuna na Allemagne. Mpe dokotolo vwandaka na lutondo mingi samu na kuvingila, yandi bikaka bébé yango ya kulala kuna. Bébé yayi ya fioti kufwaka na kintulumukina, mwana ya fioti

ya lembami, mwana ya kento ya nene. Mpe Mpangi-kento Stadskev zimbisaka mama ya yandi, mpe yandi vwandaka na mavimpi ya mbote ya kubukana. Bébé yayi kieleka kuzwaka kisika na zulu ya yandi. Mpe yandi kumaka na allo-allo, ntama mingi na Allemagne, mpe yandi zolaka pumbuka kuna. Mpe mu tubaka, “Mpangi-kento Stadskev . . .”

<sup>9</sup> Yandi ndimaka lukwikilu ya yandi, ti yandi kwikilaka ti Mfumu Yesu fidisaka munu samu na kisalu na bilumbu ya nsuka, mpe kaka kimbangi ya kukwikama yina muntu ve lendaka pesa, mpe yandi zolaka tuba yawu na ntima ya yandi ya muvimba. Yandi monaka Mfumu Nzambi kusala bima ya mutindu yina, kuvumbula bamvumbi na manima bawu kufwaka. Kasi, beno me mona, kieleka, mutindu mu . . . Wapi mutindu, wapi nkembo yina zolaka vwanda na Nzambi, na Allemagne mpe nyonso! Kana mu lendaka sala yawu, munu mosi, mu zolaka sala yawu. Kasi, kima ya ntete, beto fwana kwenda ve tii beto ke zaba yina beto ke kwenda.

<sup>10</sup> Na yawu mu kwendaka kuna mpe sambilaka. Mpe mu banza ti yandi vwandaka na lweka ya alo-allo ya ntangu mingi, na mpimpa. Mpe kilumbu yina landaka mu kotaka, ya vwandaka na kima mosi ve. Diaka Meda tubaka, kento ya munu, yandi tubaka, “Mpangi-kento Stadskev bokilaka mbala zole. Mpova mosi na Mfumu?”

Mu tubaka, “Kima ve.” Mpe mu tubaka . . .

<sup>11</sup> Mbote, mu kwendaka kuna, mu sambilaka dyaka. Mu vwandaka na mfinda na nkokila yina. Na yina, ya kieleka, ba zolaka keba bébé yango. Mpe na yina kaka mutindu mu vwandaka kota, Mfumu Yesu, vision mosi bulaka, ya kutelama na ntuala ya munu. Mpe mu kuwaka ndinga ya Yandi kutuba, “Kusemba yawu ve. Yina kele diboko ya Mfumu.” Na yina mu zabaka kuna ti Nzambi, samu na kikuma mosi, nataka bébé ya yandi na Nkembo, mpe ya kieleka ya vwandaka telemina luzolo ya Mfumu samu na munu na kutuba kima ya kuswaswana na yawu.

<sup>12</sup> Mpe na yina mu banzaka, “Mbote, ya ke vwanda ndandani ya nene. Kasi kima mosi mu salaka, mu banzaka na Mfumu. Mu salaka yina Yandi tubaka na munu.”

<sup>13</sup> Awa ntama mingi ve, mu kuzwaka mukanda mosi ya longi kuna, mpe yandi salaka nsamunu mosi na nzila ya mwa milongi ya kulutila. Yandi tubaka, “Yina . . .” Mpe yandi vwandaka, mu banza, yandi vwandaka muntu ya Allemagne. Mu ke kwikila ve. Kasi yandi tubaka, “Ya kele na kima mosi yina mu lenda sepela samu na Mpangi Branham. Ntangu baluzatu nionso vwandaka kwenda, yandi bikanaka ya kukangama tii yandi kuzwaka lukanu ya kieleka katuka na Nzambi, na yina yandi zabaka yina yandi vwandaka sala.”

14 Mpe ya kele kaka mutindu yina beno lenda sala bima yina, ya kele ntete kuwa na Mfumu, ntangu Yandi ke tuba. Kana Yandi tubaka na munu, na nkokila yayi, ti mata kuna mpe basisa na maziami, Mfumu ya yinsi Kennedy, Mu ke bokila yinza ya muvimba na kwiza, beno tala yawu mbote kusalama, samu ti mu ke kuzwa MUTINDU ME TUBA MFUMU. Beno me mona? Ntangu yayi, kasi wapi mutindu mu lenda tuba, “MUTINDU ME TUBA MFUMU,” tii Mfumu me tuba mutindu yina? Beno me mona? Beno me mona?

15 Bantangu mingi, bantu kele nionso ya kuzatuka mpe ke natama na mambu ya ngaanda mpe bima ya mutindu yina, mpe yinki ya mbote mabanza ya bawu lendaka banza. Yina ke vwandaka ve ntangu nionso ya kieleka. Beno vingila tii kuna Yandi ke tuba na beno, mpe beno zaba yawu, na yina beno kele na kieleka. Beno fwana banza yawu ve. Yandi me tuba na beno, ya kele MUTINDU ME TUBA MFUMU. Na yina Yandi me tuba na beno, na yina beno lenda kwenda tuba yina Yandi tubaka. Tii kuna, beno lenda kwenda mpe kusala nyonso yina beno lenda, kusala yina beno lenda beno mosi, kasi beno lenda ndima ve tii kuna Nzambi me tuba mutindu yina. Na yina beno me ndima.

16 Na bande ya *Wapi Ntangu Ya Kele, Batata?* Mingi ya beno kele na bande, beno me mona. Mu lendaka zonza samu na Makapu mpe kisika yankaka, mpe kutuba, “Ya kele MUTINDU ME TUBA MFUMU. Mu ke kutana na Bawanzio sambwadi. Mpe ya ke zabana, bayinsi yina kuna, beno me mona. Mpe kima mosi zola salama, samu Yandi tubaka na munu.” Yawu yina, beno me mona, bangonda tatu na manima. Beno me mona? Mpe bima nyonso yayi yankaka, ntangu beno. . . Ntangu Mfumu zonzaka yawu, ya fwana salama.

17 Ya kele samu na yina mu zaba ti Ndinga ya Yandi kele ya kulunga. Ata ti yina bantu ke banzaka samu na Yawu, Yawu kele Ndinga ya Nzambi. [Mpangi Branham me bula Biblia ya yandi—Mu.] *Ya kele* kieleka, ya kele MUTINDU ME TUBA MFUMU. Beno me mona, ya kele, mpe beto zaba ti ya kele kieleka.

18 Yesu ke kwisa. Wapi ntangu? Mu zaba ve. Wapi mutindu, wapi mutindu Yandi ke kwisa? Mu ke na dibanza mosi, kasi mu—mu zaba ve. Ya kele ya kusunika na kati *Awa*, Yandi tubaka, “Munu, kana ba zangulaka munu,” Yandi zolaka tula muntu nyonso na Yandi, mpe Yandi zolaka kwiza dyaka. Mu zaba ti Yandi ke kwisa. Oh, yina ke mbote. Mpe ya ke diambu ve samu na munu na ntangu yawu ke vwanda. Beno me mona? Kana ya kele na nkokila yayi, to kana ya kele mvula ke kwisa, to kana ya kele bamvula funda mosi katuka ntangu yayi, kaka na yina Yandi ke kwisa! Mu kele na Luzingu ya Kukonda nsuka. Mu ke vwanda ve kiboba, mu ke vwanda kaka kuna ntangu Yandi ke kwiza. Kaka yina. Ya kele, beno me mona, ya kele ve dyambu na munu ntangu, mutindu, wapi mutindu Yandi ke salaka yawu, kaka samu ti mu kele kuna!

19 Mpe Yandi silaka munu ti mu ke vwanda kuna, mpe Yandi pesaka munu yimeni Luzingu ya Kukonda nsuka, samu ti Yandi tubaka, “Yandi yina lenda kuyamba Bandinga ya Munu mpe kukwikila na Yandi yina fidisaka Munu, kele na Luzingu ya Kukonda nsuka; mpe ke kwiza ve na lufundusu, kasi me luta lufwa na Luzingu.” Ya kele mbote mingi samu na munu. Kaka kuna, yina kele dikunzi ya munu. Yina kele dikunzi ya munu. Yandi silaka yawu. Ya kele ve na mutindu samu yawu kubwa. Ya lenda kubwa ve, kulutila ve Nzambi lenda kubwa. Mpe ya lenda salama ve samu na Nzambi na kubwa. Ya kele kima mosi yina Nzambi lenda sala ve, kubwa. Yandi lenda kubwa ve. Beno ke na kiese ve samu na yawu? [Dibuundu me tuba, “Amen.”—Mu.] Oh, la la!

20 Ntangu mu bandaka na kumona bamvula ya kutanga, mpe—mpe bandaka na kumona balukutakanu zole to tatu kilumbu mosi, ya ke banda na kulembisa munu fioti, kisika ya vwandaka ve kusala munu mpasi. Kasi na yina mu banza, “Mbote, wapi luswaswanu ya ke sala?”

21 Mu zola kuyufula beno kima mosi, beto kele kaka na yinzo, na yina mu zola, yinki ke salama kana beno kele na bamvula makumi nana na nkokila yayi, to beno kele na bamvula kumi na tanu na nkokila yayi? Kana beno kele na bamvula makumi nana, mpe beno ke zinga tii na ntangu yayi mbasi na nkokila, beno ke zinga mingi, bana ya bamvula kumi na sambanu. Beno me banzaka ntete na yawu? Kieleka beno ke sala yawu. Beno kele awa samu na lukanu mosi, samu na kusadila Nzambi. Na yina wapi luswaswanu, nsungi ya kele samu na beno? Beno sadila kaka Nzambi.

22 Kana Nzambi kwizaka na munu mpe tubaka, “Mu zola ti nge kwenda na ntoto,” mpe—mpe mu vwandaka na zulu kuna mpe Yandi tubaka, “kwenda na ntoto, mu ke pesa nge bamvula nkama mosi na kati ya luzabu, kasi mu zola nge na bamvula mingi—nge. Yinki bamvula beno zola kubaka, makumi zole na tanu ya ntete, makumi zole na tanu ya zole, makumi zole na tatu, to makumi zole na tanu ya nsuka?”

23 Yinki mu ke tuba? Mbote, kana mu ke tula ntangu ya munu awa samu na kuvwanda, oh, mubudi-nkweso to athlète, to kima mosi, mu ke sala mbote na kubaka bamvula makumi zole na tanu ya ntete. Kana mu ke vwanda awa samu na kuvwanda kisadi-mabaya, to muntu mosi mutindu yina, mbote, mu ke sala mbote na kubaka makumi zole na tanu ya zole. Kasi kana mu zola kusadila Mfumu, mu ke baka makumi zole na tanu ya nsuka, kubanda makumi sambwadi na tanu tii na nkama mosi, samu, mu me kuzwa luzabu mingi, mu zaba mingi samu na yawu. Beno me mona? Ntangu nyonso yina mu lenda telama mpe kutambula, wapi luswaswanu ya ke sala mutindu ntama mu kele? Mu kele awa samu na kusadila Mfumu, mpe ya kele yawu. Amen. Ya kele mbote mingi samu na munu. Yandi silaka yawu.

<sup>24</sup> Ntangu yayi mu zola kutonda mosi na mosi ya beno, samu na bumbote ya beno. Mpe mu ke tula kivuvu na yawu, kana Mfumu kuzola, ti—ti dyaka beto ke kutana kisika mosi na ntoto yayi; kana dyaka ve awa, beto ke kwenda na lweka yankaka. Mpe Mfumu sakumuna. Mpe mu zola kusambila samu na bamuswale yayi. Kaka na ntangu beto ke kota na Nsangu, beto zaba kaka ve kieleka yina ke salama. Beto mekaka na kutula bankokila zole na . . .tatu, pene ya bampimpa tatu; na kati ya bampimpa tanu to sambanu, bampimpa tanu, mu banza, Mfumu pesaka beto mbokolo na kati-kati ya bantu, ya kubokila bantu na kubasika, kisika Mfumu ke belusa bawu. Mpe kuna beto kuzwaka nkokila mosi, mazono na nkokila, beto nataka muntu nyonso yina zolaka ti ba sambila yandi, kaka na nzila ya ndonga ya bisambu mpe sambilaka samu na bawu. Mpe mu banzaka ti mu kondwaka ve kisika mosi kuna na kumeka na kusala nionso yina mu zaba wapi mutindu kusala, samu na beto na kuvwanda na mutindu ya kulutula mbote ya kimpeve, mpe mutindu ya nzutu, na nkokila yayi, kulutula yina beto vwandaka ntangu beto kumaka awa pene ya bampimpa yiya to tanu me luta. Kana mu kubwa, Nzambi lemvokila munu, mpe nge lemvokila munu.

<sup>25</sup> Ntangu yayi samu na Nsangu ya nsuka, mpe mu ke meka na kusala yawu kaka na nswalu nyonso, samu ti mu—mu ke longaka ntangu ya yinda. Mpe mu me tuba na dibuundu ya munu, mpe nionso yina, ti, kubanda na mbala ya ntete ya mvula, mu ke meka. Mu me meka yawu kubanda bamvula makumi tatu na tanu me luta, kubanda mu vwandaka na ministere, samu na kuzenga bangunga zole yayi, mpe nionso yina, tii na baminuti makumi tatu. Kasi, mu ke malembe mingi, mu lenda tuba ve yina mu zola kutuba, na baminuti makumi tatu, ya kele kaka kima mosi. Mu kele muntu ya Sud, beno zaba, mpe na yina mu—mu fwana sala yawu. Mu lenda banza yawu nswalu ve. Mu fwana vingila kaka mpe kumona. Mu fwana vingila na Yandi, samu na bampova ya munu. Na yawu, kasi mu—mu. . .kaka ntangu nyonso yina mu lenda vingila na Yandi, mpe beno ke vwanda kaka na lembami na munu.

<sup>26</sup> Ntangu yayi beto tanga mwa Masonuku, na yina beto zaba ti yayi ke luta ve. Mpe na manima beto me vukisa mwa kimpangi ya beto mpe kusolula, ntete beto belama na kitini yayi ya kieleka ya santu ya lukutakanu, na kunataka Dimpa ya Luzingu, beto sambila kaka dyaka.

<sup>27</sup> Mfumu Yesu, ntangu yayi beto ke vutula matondo na Nge. Beto nyonso ke na kubaluka na Nge, samu na kutonda Nge samu na bilumbu yayi ya nene mpe bampimpa ya lukutakanu, kubundana pene-pene ya Ndinga, mpe na bantu. Beto ke vutula matondo, Mfumu. Bampeve ya beto me zanguka, mpe beto ke vutula matondo mingi ti beto me vwanda na lenda ya kuvwanda na bisika ya Mazulu na Nge. Mpe ntangu yayi, Tata, na nkokila yayi ya nene mpe ya nsuka ya feti ya zola, ti Nge telama na

kati-kati ya beto, dyaka na nkokila yayi, mpe ke dila, “Yandi yina kele na mpwila, kwiza na Munu.” Pesa yawu, Mfumu. Beto zaba ti Nge ke sala yawu, samu ti Nge ke sala yawu. Yina kele mutindu ya Nge ya kusala bima, mpe Nge ke sobaka yawu ata fioti ve. Mpe mu ke sambila, Nzambi, ti Nge ke buka Dimpa ya Luzingu, samu na beto. Bika ti beto vwanda na kiyeka ya kuyamba Ndinga yina na kati ya ntima ya beto, yina ke zibula kiziba ya balusakumunu na beto nionso. Sakumuna lutangu ya Ndinga, mpe sadisa munu mutindu mu ke meka na kubuka Dimpa ya Luzingu, na dibuundu, samu ti nyonso yina nsatu kele. Na Nkumbu ya Yesu Klisto. Amen.

<sup>28</sup> Beto baka Buku ya Bazuzi, Bazuzi ya Israël. Mpe mu zola kubaka kapu ya 16 ya Bazuzi, samu na kutanga kitini ya—ya Ndinga. Bazuzi, kapu 16, mpe mu zola kutanga na nzila ya 27 mpe banzila ya 28.

*Ntangu yayi yinzo vwandaka ya kifuluka na babakala mpe bakento; mpe bamfumu nionso ya ba-Philistin—ba-Philistin vwandaka kuna; mpe ya vwandaka na zulu ya muludi pene ya mafunda tatu ya babakala mpe bakento, talaka—talaka na ntangu Samson vwandaka sala ngalasisa.*

*Mpe Samson bokilaka MFUMU, mpe tubaka, O Mfumu Nzambi, bambuka moyo na munu, mu ke sambila nge, mpe pesa munu ngolo, Mu ke sambila nge, kaka na mbala mosi yayi, O Mfumu, ti mbala yankaka mu me kuzwa kitumbu ya ba-Philistin na meso ya munu zole.*

<sup>29</sup> Wapi mutindu ya kumona ya mawa! Mpe mwa dilongi yayi, mu ke baka dilongi na yawu, ke bokila: *Kaka Mbala Mosi Dyaka, Mfumu*. Kaka mbala mosi dyaka!

<sup>30</sup> Ya zolaka vwanda kilumbu ya mwini ya ngolo. Ba vwandaka na mukembu ya nene. Mpe ya ke sala munu mpasi, ntangu nionso mu ke banza na yawu, samu nkadulu ya mukembu yina ya nsambulu. Beno zaba, mukembu kele mbote, kasi ya kele landila nkadulu ya mukembu. Mpe yayi vwandaka mukembu yina mu ke zolaka ve kutubila. Ya vwandaka na yinsi ya ba-Philistin. Mpe ba vwandaka kembila, ya ke sala munu mpasi na kutuba yawu, “lunungu na zulu ya bisadi ya Nzambi.” Kisadi ya Nzambi yina tumamaka ve nataka nsoni na Nkumbu ya Mfumu, mpe kubwaka, mpe ba-Philistin yayi vwandaka kembila ntangu ya nene ya lunungu, ti “nzambi-mbisi ya bawu kuzwaka lunungu na zulu ya kisadi ya Yehowa.”

<sup>31</sup> Kana ya kele ve dilongi samu na kumanisa lukutakanu! Kasi mu kuwaka lutwadusu, mutindu mu vwandaka tala na kati ya mwa masonuku bankama tanu to sambanu yina mu kuzwaka kuna, meso ya munu kubwaka na zulu ya dilongi yayi awa, mpe mu banzaka, “Mu ke kwikila ti mu ke zonzila yawu kaka mwa ntangu fyoti na nkokila yayi.” Mpe mu banza ti ya kele

yina Mpeve-Santu ke zola ti beto kuzaba kima na zulu awa. . . .  
pene. . .

<sup>32</sup> Kilumbu ya mwini ya ngolo, mu ke kwikila, mpe minkayulu vwandaka pela na tiya pene-pene ya mbisi yayi ya nene nzambi, mpe ya vwandaka na ba-Philistin tatu yina vwandaka tala na yisi na makulu zole mutindu bawu kotaka na stade ya nene. Ya zolaka vwanda mutindu muntu ya miziki, mutindu ba yidikaka yawu. Mutindu, mu zola kutuba, kima mosi na zulu ya ndonga ya—ya buboko to buboko ya yimbi, kumaka mutindu *yayi*, na makunzi zole ya nene, to—to bapoto, yina vwandaka simba stade, mutindu ya ke fwanana mingi na mutindu *yayi*, mu banza, na yina bantu na kati ya stade yayi ya nene lendaka mona mpamba bansaka yina vwandaka salama kuna na ntoto.

<sup>33</sup> Mpe bamfumu ya mvita yina me longukaka mambu ya zulu mingi vwandaka na lukutakanu yina, mpe bakento ya bawu ya kitoko na mayaka vwandaka na lukutakanu. Mpe bawu nionso sutopaka na mbala mosi, yina vwandaka yekama na ntwala, diambu ya nene vwandaka pene-pene na kusalama. Beto bantangu yankaka, yina beto ke bokilaka, mambu ya ntete, bawu. . . mpe na manima nkotolo, mbandukulu tii na diambu ya nene. Mpe bawu vwandaka na bansaka mingi, mutindu bawu salaka bantangu yankaka, na kupesaka munkayulu mpe na kufwaka, mpe nyonso yina. Kasi ntangu yayi dyambu ya ngudi vwandaka kaka na kutala na kusalama, mpe nkonga nyonso yayi ya bantu ya lukumu ya mbote, ya bawu nionso. . . ya bizunga na yinsi ya ba-Philistin. Bawu telamaka, samu ti bawu vwandaka bweso. Bawu vwandaka ya kuvwanda na zulu, na kati ya nene yayi, beto ke bokila yawu, mutindu muntu ya miziki. Mpe mu banza bamputu, mpe nionso yina, vwandaka awa na—na ntoto. Kasi bawu vwandaka kisika bawu lendaka kuzwa kutala ya mbote, mpe kumona bansaka nyonso. Ya vwandaka—ya vwandaka kivinga ya lukumu. Mafunda tatu na kati ya bawu! Mupepe vwandaka basisa nsunga ya malafu, ba vwandaka sepela na kulawukaka malafu kilumbu ya muvimba, ba vwandaka kunwa malafu mpe vwandaka basisa mate, mpe vwandaka landila, mutindu kunwana ya kulawuka malafu lendaka vwanda mutindu yina. Mpe bawu nyonso telamaka, samu ti dyambu—dyambu ya ngudi zolaka salama, mpe bawu vwandaka ya kuyekama. Bawu zolaka kuzwa kutala ya mbote. Bawu zolaka kondwa yayi ve, samu ti yayi vwandaka dyambu ya ngundi.

<sup>34</sup> Yinki bawu monaka? Mwana-bakala mosi ya fioti ke twadisa mpofu na kati-kati ya ntoto, na mukembu ya nzambi-mbisi, Dagon. Mwana-bakala yango vwandaka twadisa nkonga ya nsuni yayi vwandaka tekita, ya mpofu, mpofu, na poto, mpe tulaka yandi na lweka ya poto, samu na kusala ngalasisa.

<sup>35</sup> Na yawu yayi kele Samson, muntu yina vwandaka kisadi ya kulutula nene ya Nzambi, ntangu yayi yandi me telema kuna,



na nsoni, mpofo, ya kulemba, na mawa. Ya kele kifwani ya—ya nsungi ya kuvwalangana, ya kudinda. Ya kele kifwani ya—ya—ya yinsi yina me zimbisa kusimba ya yawu na Nzambi. Ya kele kifwani ya dibuundu yina me zimbisa kusimba ya yawu na Ndinga ya Nzambi, samu yawu yina Samson talisaka awa. Ya kukikulumusa, ya kubukana, yandi vwandaka na mpasi ya nene mutindu yandi vwandaka kuna, to yandi telemaka kuna, mu zolaka tuba. Na yawu beno lenda banza yandi kele ya kutelama, muntu ya nene yayi yina, kilumbu mosi, yina yandi lendaka sala; mpe yandi yayi me telama awa na mutindu yina, ya kukikulumusa, mutindu mu tubaka, ya kubukana, kidimbu yina mu zola tuba na nkokila yayi. Kidimbu yayi ke talisa ngunga yina beto ke na kuzinga ntangu yayi, mutindu ya dibuundu ntangu yayi; ya kubukana, na ngaanda ya Ndinga ya Mfumu; na nsoni, na ngaanda ya kisika ya yawu. Mpe kyuvu ke na kwiza, bubu yayi, bisono kele na zulu ya kibaka mpe nani lenda tanga yawu? Bawu zaba kima mosi ve samu na yawu.

<sup>36</sup> Beto baka mpe beto tala mabanza ya ba Phillistin yina. Nkumbu ya muntu yayi, Samson, na ntangu mosi, nataka yinsi ya muvimba na kubula, tubaka kaka Samson, samu ti Nzambi vwandaka na yandi. Mpe bayinsi vwandaka tekita samu na nkumbu ya yandi ya kieleka.

<sup>37</sup> Ya kele mutindu mosi ya vwandaka, Nkumbu ya Yesu Klisto, kasi ntangu yayi ba me sadila Yawu mutindu mpova ya nsingulu, bansaka. Ya ke monana diaka ve na buzitu na Yawu. Ntangu, Nkumbu yango kele na zulu ya konso nkumbu yina ba bokilaka na bandinga yina ke kufwa. Ya kele Nkumbu yina mpe Yawu kele ya kuzanguka mingi na zulu ya konso nkumbu yina kele na Mazulu, konso nkumbu na zulu ya ntoto, mpe dibuta nyonso na Mazulu mpe na ntoto kele na Nkumbu ya Yawu. Mpe kasi muntu ke bakaka Yawu na nsingulu, bamambeke ya dibuundu ke sadilaka Yawu na bansaka, mpe bantwadisi mingi ya misambidi ke vweza Yawu na ba-credo ya bawu. Ya kele samu na yina ti beto kele na nsoni, na ntwala ya communisme, ba-Romain, mpe ba-Protestant, mpe bima yina ke na kumata na ntoto bubu yayi. Mpe ya kele samu na yina ti beto kele na nsoni. Beto fwana zaba bamvutu yayi. Nzambi kele na yawu na kati ya Buku ya Yandi, samu na kilumbu yayi, kasi beto kwendaka na kima yankaka, zimbanaka Yawu.

<sup>38</sup> Mingi ya ba-Philistin yayi, mutindu bawu telemaka kuna, binwani mvita yina ya nene, kukondwa ntembe. . . Muntu mosi zabisaka na ntwala, ti, “Diambu yina ke landa kele Samson.” Mingi na kati ya minwani-mvita yayi, na bakento ya bawu ya kitoko na mayaka mpe ya kulengula, vwandaka talaka kuna na kitini ya zulu mpe bambukaka moyo na kumonaka Samson ya kutelama na mutindu ya kuswaswana, na ntangu mosi ntangu Mpeve ya Mfumu vwandaka na zulu ya yandi; ya kutelama na ditama ya mulet, na maboko ya yandi, na ba-Philistin yina

vwandaka pene-pene ya yandi. Mpe ba kwendaka mbangu na ditadi kisika mosi kuna, samu na kubaka kisika ya kubumbama.

<sup>39</sup> Ntangu bakala mosi lokutaka mbanga ya mpunda yina vwandaka kuna na ntoto ya kuyuma, muntu nionso zaba ti kubula mosi na zulu ya ditadi to kima mosi, na mukwa yina, zolaka kupanza yawu na bitini. Mpe bayimpu yayi, yankaka na kati ya yawu vwandaka ya pouce mosi, tii na pouce mosi na ndambu, ya bunene, ya kisengo. Mpe muntu yayi vwandaka ve soda, mpe yandi vwandaka ve muntu ya kulunguka samu—samu na dyonga. Mpe ba-Phillistins na kazaka ya bitumba, kazaka ya bitumba ya kukanga mbote, vwandaka nata mpunda mutindu banela ya matenzi, na bisengo yina vwandaka bumba madyonga mpe bima na kubula bawu; mpe dyaka na bayimpu, kinwanunu ya kisengo mpe na madyonga. Mpe bawu zungaka muntu yayi, Samson, mpe banzaka, “Crème ya nene ya makesa ke vwanda na lenda ya kubaka muntu yayi.”

<sup>40</sup> Mpe yandi vwandaka na kima mosi ve na diboko ya yandi. Mpe yandi kuzwaka mukwa mosi ya ntama ya mbanga ya mpunda, mpe yandi bandaka na kubula, na diboko ya kibakala mpe ya kikento, tii kuna yandi bulaka ba-Philistin. Samu na yinki? Biblia ke tuba, “Mpeve ya Mfumu vwandaka na zulu ya yandi.”

<sup>41</sup> Awa yandi vwandaka, ya kuswaswana ntangu yayi. Yandi bikaka kinsweki ya yandi. Mpe bawu lendaka bambuka moyo na yandi pwelele.

<sup>42</sup> Ya lendaka vwanda na kimvuka yankaka kuna, lendaka bambuka moyo na nokila mosi ntangu Delila lokaka yandi na kati ya mbanza ya—ya Gaza. Mpe ba kangaka mielo ya bawu ya nene, na kutala ba-tonne mosi to kulutula, na kitini mosi, mielo ya nene ya kisengo na mbanza, yina vwandaka na ba-barre ya kisengo yina vwandaka na kati ya matadi mpe ya kukanga, na bafungula yina beto lendaka ve kuzwa yawu bubu yayi. Mpe bawu tubaka, “Ba Phillistin ke na zulu ya nge, Samson.” Mingi ya basoda yina vwandaka ya kutelema pene-pene ya mwelo, mpe vwandaka ve na diambu ya kutuba, ntangu yandi lendaka buka bansinga mpe kukwenda. Mpe ba mwangisaka bawu mutindu nkonga ya ba-wagon na mpimpa, ntangu ba me pelisa nsemo. Mpeve ya Mfumu na zulu ya yandi, tandaka diboko mpe basisaka mwelo mosi, mpe basisaka mosi yankaka, mpe tulaka yawu na dipeka ya yandi mpe mataka na zulu ya mongo, mpe vwandaka. Ba lendaka bambuka moyo na yawu. “Wapi munwani-mvita,” mingi ya bawu lendaka bambuka moyo na yawu, na kumonaka yandi na lunungu ya nene, “kasi beno tala yandi ntangu yayi!”

<sup>43</sup> Yina kele foto ya dibuundu. Mu lenda tanga na kati ya Biblia, ya dibuundu ntangu ya vwandaka ntete ya kufuluka na Mpeve-Santu, bidimbu ya nene mpe mambu ya ngitukulu ke tambula na balukutakanu ya bawu. Beto lenda bambuka moyo na mwa

bamvula me luta, bamvula makumi yiya to makumi tanu me luta, ntangu dibuundu fulukaka na Ngolo yina mosi. Kasi beno tala yawu bubu yayi, yandi me vwanda swi. Kima mosi me kanga yandi, kima yina mosi kangaka Samson, nionso salamaka na nzila ya kuwa kento yina yambaka yandi. Mpe yina kangaka dibuundu, kele kuwa mutindu ya kento yina ba yidikaka, Jézabel yina ya kiboba. Kima yina kaka Samson telemaka samu na kununga, nungaka yandi. Mpe dibuundu ya ba-Pentecotiste, na nkokila yayi, kele na kati ya banzila yina mosi. Kima mosi yina yandi telemaka samu na kununga, malongi ya denomination, yandi me vukana dyaka na kati ya yawu, mpe ngolo ya yandi me kwenda. Kieleka. Ngolo ya Mfumu bikaka yandi.

<sup>44</sup> Beto zolaka zaba yawu ntangu nyonso, na nzila ya disolo, ti dibuundu me salaka ntete organisation, Nzambi bikaka yawu kaka kuna. Yawu kubwaka mpe vumbukaka diaka ata fioti ve. Mpe Pentecote vwandaka kima yina basikaka na denomination, kasi, yina ya vwandaka, beto ndimaka lutwadusu ya bantu na kisika ya Mpeve-Santu.

<sup>45</sup> Mpe yawu yina kieleka Samson salaka. Beno banza na yawu, yina zolaka luta na dibanza ya muntu yina na yina yandi telamaka kuna. Yandi zolaka banza na balunungu nyonso ya nene yina Nzambi pesaka yandi, bima ya nene yina Nzambi salaka na yandi mpe samu na yandi; mpe mutindu ti, na yina yandi vwandaka na Nzambi, ngolo ya Mpeve ya Yandi, mpe kiese mpe ngemba yina yandi vwandaka na yawu na ntangu yandi vwandaka na Nzambi, mpe ya Nzambi mpe bantu ya Yandi. Yinki mutindu Samson nungaka Yandi! Ntangu yayi, kaka yinsi yina Samson telemaka samu na kubebisa, kangaka yandi.

<sup>46</sup> Mpe kima ya kieleka yina Nzambi vumbulaka Pantekote na kusala, me kanga bawu, kangaka mbundana, kangaka ngolo; bamambele ya kuningana, na kidi-kidi, madidi ve tiya ve. Bima ya mbote, ya nene, nyonso, kasi ba ke vwanda mbote kana ba—kana ba vwandaka na Armée du Salut ya ntama, to mwa guitare ya ntama, kuna na nsongi kisika mosi diaka. Mu ke zola mingi kuvwanda na yawu mutindu yina, kulutila kuvwanda na ba-cathédrale ya beto yina beto ke na kuzwa, ke lomba mafuku ya ba-dollar.

<sup>47</sup> Kasi yandi telemaka kuna. Yandi kubwaka. Ntangu yayi yandi vwandaka muntu ya boloko ya yinsi ya kieleka yina Nzambi telemisaka yandi samu na kubebisa.

<sup>48</sup> Ba vwandaka balula yandi, samu na kusadisa yandi bansaka. Mpe yawu yina kaka bubu yayi, mwa kima mosi ya kusekisa samu na kumeka na kuyangidika bawu.

<sup>49</sup> Yandi bikaka kento mosi kubenda yandi na Ndinga ya Nzambi ya nsilulu! Ya kele kima mutindu mosi dibuundu salaka, me bika kento, Jézabel, “mama ya bakento ya kindumba,” yina me talisama na Apocalypse 17, bendaka bawu dyaka na bima

yina ba lukaka yina bawu basikaka. Mutindu Biblia ke tuba, “Mutindu ngulu ke vutuka, ke vutuka na poto-poto ya yawu, mpe yimbwa na biluki ya yawu.”

<sup>50</sup> Mpe ntangu nyonso yina ngulu kele ngulu, yandi ke, nkadulu ya yandi kele ngulu, yandi ke vutuka kaka na poto-poto. Mpe, beno, mutindu kaka beno ke bumba yandi na dibulu ya poto-poto kele kusoba nkadulu ya yandi.

<sup>51</sup> Ya kele kaka mutindu yina beno ke kuzwa luswaswanu na dibuundu bubu yayi, ya fwana vwanda na nsobolo ya nkadulu. Mpe na kisika ya sysiteme mosi ya dibuundu yina ke twadisa milongi bisika nyonso, ya ke baka Mpeve-Santu, na nzila ya Ndinga, samu na kuvutula bawu dyaka na mpeve yina ke zitisaka Nzambi. Ya kele kieleka. Kana yimbwa me luka mpe ya me kumisa yandi ya kubela na kifundu ya yandi, mbala ya ntete, ya ke sala dyaka yandi ve kubela? Mpe kana Nzambi bokilaka beto na kubasika na mvindu ya mutindu yina, samu . . . mbote, ya ke sala diaka kima ya mutindu mosi ve? Na yina beto ke vutuka mbala mosi na kati ya yawu, kima mutindu mosi. Ya zolaka salama ata fioti ve.

<sup>52</sup> Systeme yayi ya Jézabel, ntangu yayi mpofo na kimpeve, Mu ke tuba, na Ndinga ya Nzambi, kuvukana bawu mosi kaka na Kimvuka ya Mabuundu. Nyonso, malongi ya beto ya nene ya kumwangisa nsangu, beto fwana pesa yawu, samu na kuvwanda organisation. Samu ti, ba-organisation nyonso yina kele ve na kati ya Kimvuka yayi ya Mabuundu, Mu kele na zulunale na zulu ya yawu, ti ata ti dibuundu ya beno kele ve na kati ya Council yayi ya Mabuundu, na ntangu ya mpasi, bawu lendaka sadila dibuundu ya beno samu na kukutika minduki to kima nionso yina bawu zola. Mpe kana muntu mosi me simba kisambu samu na muntu mosi, na ngaanda ya kuvukana na Council yayi ya Mabuundu, ba lendaka kubula yandi, mutindu cour fédérale. Ya kieleka. Mu kele na mikanda na zulu ya yawu, ya Washington. Beno, ba ke pusa beno na ngolo kati na yawu. Ya kele samu na yina mu me telemina systeme yayi ya organisation. Yawu yina. Mu zolaka bumba yawu swi samu na yawu na kuvwandaka kidimbu ya kibulu, kasi ntangu me luta mingi ntangu yayi ti beno lenda zaba ti ya kele kieleka. Uh-huh. Beno me mona? Ya kele. Ya kele kieleka yawu.

<sup>53</sup> Ntangu yayi yinki yawu me sala? Yawu me nata dibuundu, me katula yandi ngolo ya yandi, kima yankaka ve kasi nkumbu, ya ke lakisa yawu kieleka na Apocalypse 3, Nsungi ya Dibuundu ya Laodicée, mangaka Klisto, mpe na ngaanda. Kieleka. Samu na yinki? Ya salaka kaka kieleka mutindu mama ya yandi salaka, vutukaka na denomination. Pentecote, ya kubutama na denomination, ya kubutama na yawu; mpe kaka na ntangu bawu kuzwaka nkonga ya bana me katuka na lukolo mosi, mpe ba zolaka kuzwa baseminere mpe nyonso, na kisika ya bivinga ya zulu. Mpe ntangu yayi, mingi ya mabuundu ya nene, muntu

fwana luta kizama ya yintu na ntwala yandi kuzwa muswa ya kuvwanda missionnaire na bayinsi ya nzenza. Dibuundu ya ntete zolaka kumeka ve, kizama ya yintu, kasi ba zolaka luta na kumekama ya Menga ya Yesu Klisto, yinki salaka luswaswanu.

<sup>54</sup> Beno tala, Samson pesaka kinsweki ya yandi na Delila. Na nsuka yandi zolaka yandi mpe yambaka yandi, mpe tubaka na yandi ti yandi vwandaka bakala ya mbote, mutindu yandi zolaka yandi, tii yandi monaka kisika kinsweki vwandaka, na yina yandi zengaka kinsweki.

<sup>55</sup> Mpe ya kele kaka kieleka mutindu mama ya kiboba ya Jézabel salaka dibuundu ya ba-Protestant, me kangama. Mpe ntangu yayi ba ke kakula mwa malongi yina ba tubaka ti ba ke na yawu, na yina ba lendaka vukana kuna na yinza. Mpe kisika ya ntete dibuundu wapi dibuundu katulaka bafungula ya yandi vwandaka na Nicée, mpe yandi ke zenga dyaka yawu tuka yandi vwandaka awa. Yina kele kinsweki ya yandi, ya kele Ndinga. “Kana beno ke vwanda na kati ya Munu mpe Ndinga ya Munu ke vwanda na kati ya beno, beno lenda lomba yina beno zola, ya ke salama samu na beno.” Beno me mona, ya kele kisika bawu ke zimbisa kinsweki ya bawu. Ntangu yayi beno tala bawu, ya kunungama kaka mutindu Samson vwandaka. Milongi, na kisika ya kubutuka . . .

<sup>56</sup> Mutindu David duPlessis tubaka kilumbu mosi, “Nzambi kele ve na mitekolo ya pantekote.”

<sup>57</sup> Kasi ya kele mutindu beno ke tubaka, “Mama ya munu vwandaka pentecotiste. Yandi kuzwaka nzingulu. Yandi salaka *yayi*. Tata ya munu salaka *yayi-mpe-yayi*.” Yina kele na kima ve ya kusala na beno. Beno fwana vwanda na kima mutindu mosi.

<sup>58</sup> Ntangu yayi beto kele na baseminere yina ke basisaka milongi ya beto, mpe beto ke na kutunga ya kulutila nene mingi ntangu nyonso. Mpe—mpe beto me longuka psychologie. Mpe ya kele nyonso ya kulunga kana beno zola kulonga psychologie, kasi mu ke kipe ve psychologie. Mu zola kaka kuzaba Yesu Klisto, kaka yina mu—mu . . . nyonso yina mu zola zaba, kele Yandi. Ntangu yayi beto ke mona ti beto me kuzwa yawu. Kieleka ya fwana salama profesu ya Zole ya Timothée 3, kisika bawu ke vwanda, “tiya ve madidi ve,” beno zaba, “bantu ya lunangu, bantu ya lufundu, bantu yina ke zolaka biese kulutila Nzambi, mpe bantu yina ke zitisaka ve bandinga ya bawu, bantu yina ke kukipekisaka ve, mpe—mpe bantu ya kudasuka, mpe bantu yina ke zolaka ve bantu ya mbote.”

<sup>59</sup> Yinki ya me sala na beto? Ya me sala bakento ya beto ya Pentecote mutindu muntu ya Hollywood. Ya kieleka. Ya vwandaka yimbi na kukwenda na cinema, kutala ba-film. Kasi ntangu yayi, beno zaba, diabulu me bula bawu na yawu, yandi me tula yawu na kati ya yinzo. Beno me mona? Ya kieleka. Ya vwanda vwandaka na yimbi na kusala yawu. Ya vwanda

vwandaka na yimbi samu na bampangi ya beto ya bakento na kuzenga nsuki ya bawu to kulwata ba-robe ya nkufi. Kasi ntangu yayi ya kele ve, ve na mutindu ya Pantekote ya kubanza, na organisation ya bawu. Kasi ya kele dyaka luvunu, na nzila ya Ndinga ya Nzambi! Kasi, beno me mona, bawu kele na ngolo ya bawu—ya bawu—ya bawu—ya bawu ya kuzenga. Uh-huh. Beno me mona? Mpe kuna bawu ke tuba, “Mbote, dibuundu ya beto ke kwikilaka . . .” Mu ke kipe ve yina dibuundu ya beno ke kwikilaka. Ya kele yina Nzambi tubaka! Ya kele samu na yina yandi me telama, bubu yayi, kukondwa mvutu.

<sup>60</sup> Ya kieleka mutindu Samson telemaka. Samson vwandaka mutindu mosi. Yandi zolaka banza na bifu ya yandi, mutindu yandi telemaka kuna. Mu ke kwikilaka ve ti bakala mosi lendaka telama kuna mpe kubanza mbote-mbote, kasi yinki lendaka banza, na kuzabaka, yandi yayi awa ntangu yayi, yandi kumaka kaka ditadi ya disakuba. Wapi mutindu, muntu ya nene ya kutelama kuna! Muntu nyonso yina vwandaka ntete na kati ya yandi, mutindu mu ke bokila misisa, mosi na mosi ya yawu vwandaka kuna. Yandi vwandaka dyaka na misisa ya yandi. Yandi vwandaka dyaka na misisa ya yandi ya nene, na bansongi ya yandi vwandaka na yawu. Yandi vwandaka na makofi ya nene. Yandi vwandaka kaka nene mutindu yandi vwandaka ntete. Ya kieleka, dibuundu ya ba-Pentecotiste kele nene mingi kulutila yina ya vwandaka, kasi wapi kisika vwandaka Nzambi? Yawu yina. Yinga. Mutindu yandi telamaka kuna, na kubambukaka moyo na bantu ya yandi, yandi bambukaka moyo na yina nataka yawu ntete. Yinki nataka yawu, ntete, vwandaka ve kieleka meso ya yandi ya kimuntu kufwaka, kasi ya vwandaka kumona ya yandi ya kimpeve kufwaka, ti yandi bikaka Delila kuvuna yandi na kati ya yawu.

<sup>61</sup> Mpe yawu yina me kanga dibuundu bubu yayi, kele, kumona ya kimpeve ya Ndinga ya Nzambi yina ba sobisaka samu na kinkunku ya ba-credo. Ya kele disu . . . Diabulu me, kima ya ntete yandi lenda sala, kele kufwa meso ya beno, kutuba na beno, “Ya kele nkonga ya ba-exalté,” tuba na beno, “Ya kele *yayi, yina, to yankaka*, to mwa mouvement ya dyabulu, to ya kele *télépathie mentale*, to kima mosi na ndonga yina.” Kana yandi lenda bula meso ya beno, beno kele na kati ya mpimpa.

<sup>62</sup> Mpe beno tala kilumbu ya ntete na Samson na kisambu ya yandi, “Mfumu, ti mu ke vutula yimbi na yimbi na meso ya munu zole!” Yandi zabaka ti ya kele kisika yina mpasi ya yandi kwisaka. Beno tala, bansuki ya yandi basikaka, kasi yandi vwandaka mpofo. Yandi zolaka tekita, bilumbu ya yandi nionso. Yandi vwandaka mpofo.

<sup>63</sup> Beto lenda vwanda na masini mosi ya nene mutindu beto me kuzwaka ntete ve, mpe mutindu bamambeke ya kulutila; kasi wapi mbote ya ke sala, kana beno kele mpofo na kima yina ke

salama na ntwala ya beno, mpe beno lenda mona yawu ve? Yinki ke salama kaka awa, kilumbu na manima ya kilumbu, na ntwala ya bantu, Mpeve-Santu ke kukimonisa Yandi mosi, mpe bantu ke mona yawu ve. Yina kele mpofu, mpofu ya kimpeve!

64 Bawu telamaka mpe talaka Yesu kusala bimangu, mpe nyonso yina, mpe tubaka ti Yandi mosi kele Mesiya, mpe bawu lendaka ve kumona yawu. Yandi tubaka, “Bawu kele na meso, kasi bawu lenda mona ve.” Bawu vwandaka meso ya kufwa.

65 Mpe Samson vwandaka mpofu. Kasi tala yina Samson ndimaka, ti dibuundu me kwisaka ntete ve, yandi zabaka ti ya vwandaka na bweso ya kuvutuka dyaka.

66 Kana dibuundu lendaka kaka kuzaba yawu, ya lendaka salama, kasi bantu ya bubu yayi ke monana diaka ve na vision. Ba ke bakula yawu ve, ti ya kele na bweso. Ya ke luta ve. Beno lenda boka mwa mingi, beno telemisa maboko ya beno mwa fyoti dyaka, to kubina fyoti dyaka, ya kele yawu ve. Ve. Ya me vutuka na Ndinga; ya kele na bweso ya kuvutuka mpe kuzwa Ndinga na kati dyaka. Beno me bika Yawu kuna. Beno tala, ba me vwanda swi. Oh, kieleka, ba ke bula maboko ya bawu? Yinga, tata. Kasi, beno me mona, ya kele nyonso ya bawale, kukondwa kizundu.

67 Mu me monaka mimpani ke bula maboko ya bawu, ke bina, ke zonga na bandinga, mpe kusala bima yina nionso, mpe kutendula yawu, kasi ya vwandaka mimpani ya Afrique. Ya kieleka. Mu monaka bawu kutula kilapi na ntoto, mpe dokotolo yina ya ndoki telemaka kuna mpe salaka kilapi yina kutelama, mpe ke kima mbangu bisika nionso na kisika mosi kuna, mpe vutukaka mpe bulaka, mutindu, “kukatula bansuki mpe kuzenga bansuki, bitini zole,” mpe yemaka ndinga yina me zabana ve mpe sonikaka yawu, mpe mosi ya bawu telemaka kuna, tendulaka yawu. Oh, la la!

68 Beno lenda tala yawu ve. Mingi ya bawu ke zonzaka na bandinga mpe bawu ke manga misiku ya kieleka ya Yesu Klisto. Mu me nata Biblia ya munu, me tula Yawu mbala mosi na muntu; yandi me telama kuna, ke zonga na bandinga. Mpe mu ke tuba, “Mpangi, *Yayi* kele kieleka.”

69 “Mu zola ve kumona Yawu. Nkembo na Nzambi! Mu zaba yina Yesu tubaka, mu ke kipe ve yina me tala Yawu. Alleluia! Nkembo na Nzambi,” mutindu yina. Na yina, muntu yina ke balula mukongo ya yandi na zulu ya Kieleka mpe kieleka ke lwata mutindu yina, samu na kulandila na kumona Kieleka, yina kele luvunu, mpe yinda ya yawu, kaka samu yandi zolaka pesa kalati ya yandi ya kubundana kana yandi ndimaka yina vwandaka Kieleka. Ya kele yimbi mingi kulutila Samson. Beno tala, kasi bawu simbaka Yawu ve. Bawu vwandaka ya kukangama.

70 Ntangu yayi, oh, ya kieleka, beto kele na ba-kuvukana ya nene, “balukutakanu,” beto ke bokilaka yawu, ba-reveil ke

nataka yawu, mpe nyonso yankaka, ya kufuluka na bafololo, kieleka, bima ya nene, mpe luzabusu ya nene, “Muntu na nsangu ya ngunga, mpe *Kingandi* mpe *Kingandi*.” Beto kele na nyonso yina, kasi wapi kisika kele Nzambi? Ti, ya kele kima yina beto ke na kusosa, wapi kisika kele Nzambi? Kitini ya nene ya kutula kisalu ya science, muntu mosi na mingi ya malongi yina zolaka ve. . . kusadila mpova yina ndambu ya bantu lendaka ve kubakula yina yandi vwandaka tuba, mpe kasi yandi kele na diplome ya lukumu, mpe diplome, mpe diplome, mpe diplome, yina yandi lenda vukisa mpe kutula bampova kintwadi, mpe ke telama ya kusungama mingi, mpe ke tuba “amen” kaka kieleka, mpe ke baluka mutindu basoda, ke kwenda na estrade. Kasi wapi kisika kele Nzambi?

<sup>71</sup> Samson telemaka na kisika yina kilumbu mosi, yandi mosi, mpe zabaka ngolo ya Nzambi, kasi ntangu yayi yandi vwandaka zenga bamuswa yina. Yandi vwandaka kaka nene mutindu yandi vwandaka, kasi Nzambi vwandaka kuna ve.

<sup>72</sup> Beto kele na mingi ya yawu bubu yayi. Ya kele yimbi mingi ti beto kele na yawu, kasi beto kele na yawu. Ntangu yayi beto me tala. Kasi ya ke vutula ve Mpeve ya Nzambi. Ntangu yayi, kima ya yawu kele, bantu ke zola ve kufuta ntalu samu na kuvutuka na Yawu. Mu ke kwikila ti Nzambi kele kaka mutindu mosi Yandi vwandaka ntete. Kasi, kima ya yawu kele, bantu me kota mingi na yinza, mpe yinza na kati ya bawu, tii bawu kuzwaka kaka mingi ya nsambulu samu na kusala bawu bantu ya mawa. Ya kele ve mingi samu na kubika Nzambi mpe kupesa ntima ya beno ya muvimba na kati ya Yandi, kasi mingi, “Yinga, mu ke kwendaka na yinzo-Nzambi. Ya kieleka, mu ke sepelaka na bankunga ya mbote mpe ke bula maboko. Yinga, mu zola yawu, beno me mona.”

<sup>73</sup> Kasi ntangu ya ke kulumuka kaka samu na kulakisa yina beno ke tuba beno ke kwikilaka na kusala, mpe zola kufunguna yimbi, bawu ke salaka yawu ve. Ya kele kaka kuna ve. Bawu kele na yawu ve. Mbote, ya kele kieleka kundimisa. Ya kele yina beto kele na yawu nsatu. Beto me bika yawu ntama mingi, ntama mingi ve, mpe sobisaka yawu. Kisambu, mpe—mpe funguna, mpe kundimisa, beto sobisaka yawu na emotion, mbote mosi, bakuningana mosi, to kudumuka na zulu mpe na ntoto. Ya kele samu na yina ya kele ve ya kukangama, samu ti ya kele ve na kima kuna samu na kukanga bawu, tii beno ke kwiza na zulu ya lufulu ya Ndinga ya Nzambi, ya mawa ya santu, ya kukubama na kubalula ntima mpe kusungika kima mosi, mpe kusala yina kele mbote, ya kukubama samu na kuzinga mbote. Mu ke kipe ve yina bantu ke tuba, to kima yankaka, beno ke zinga samu na beno, samu na Yesu Klisto mpe yina Yandi tubaka. Na yina beno ke baka dibuundu mutindu yina, beno ke vutuka, ya kele na bweso ya kukwiza. Kasi bawu zola ve kusala yawu.

<sup>74</sup> Samson sambilaka mbote, “Mfumu, bika mu kufwa na ba-



Philistin yayi.” Oh, la la! Beno me mona yina ya ke lomba yandi? Yinki kana Nzambi kupesa mvutu na kisambu ya yandi? “Bika mu kufwa.” Oh! Mu zola yawu.

<sup>75</sup> Ya vwandaka Patrick Henry tubaka, “Pesa munu kimpwanza to pesa munu lufwa”? Ya kele kieleka.

<sup>76</sup> Mbote mingi, ya kele yawu, kimpwanza to lufwa! Ya me vutuka na Nzambi, to—to lufwa. Yinki beto ke sala? Yinki beto ke na kumekula? Yinki beto ke meka na kubula, Buklisto? Kana Mpeve-Santu kele dyaka Mpeve-Santu yina kubwaka na Pantekote, Yawu ke salaka kaka bima mutindu mosi Yawu salaka kuna. Ngolo mosi, Mpeve mosi, Yawu ke sala mutindu mosi. Beto ke na nsatu ya kimvuka ya mabuundu ve. Beto ke na nsatu ya kuvutula Biblia na kusalu. Ya kieleka.

<sup>77</sup> Ntangu yayi beto ke mona ti Samson sambilaka mbote, “Mfumu, bika mu kufwa na mbeni,” kufwa na mbeni yina nataka yandi mutindu yina. Kana ya kele na kima yina bantu fwana sambila, na nkokila yayi! Mpe beto ke mona kima yina salaka yayi, kele kukwenda ntama na Biblia, na credo. Na yina, kufwa na kima yango, basika na yawu! Kufwa na yawu. Samson vwandaka zola kufuta ntalu samu na kuvutula Ngolo ya Nzambi. Ya kele na ntalu ba ke futa samu na Yawu, kasi, bubu yayi, bantu ke monana ve na kusala yawu.

<sup>78</sup> Oh, beto ke kuwa reveil, kieleka. Yinga, beto kele na reveil ya ba-denomination, ke kotaka na bamambeke mingi, mpe bima ya mutindu yina. Kasi beno tala bankadulu, ya ke na kubeba ntangu nionso. Beno tala mutindu ntama mpe ntama mingi na Nzambi bawu ke na kukwendaka ntangu nyonso, ke kwenda ntama na Ndinga. Mpe ntangu yayi ntangu bawu ke kota mpe ke kota na Kimvuka ya Mabuundu, na yina, ba me ndima muntu ya kulutila nene yina ndinga ya dibuundu me kuzwa. Ndinga yina Nzambi bikaka na bawu, bawu bikaka Yawu nionso. Beno lenda longa Biblia yina ve; beno fwana kulonga credo ya bawu. Yawu yina.

<sup>79</sup> Samson zabaka kima mosi, mpe mu ke kukiyufula kana dibuundu me bakula bubu yayi. Yandi zabaka ti kondisyo ya yandi ya retrograde lendaka ve kukutana na ntembe ya ngunga. Mpe mu zaba, bubu yayi, ti nkadulu ya retrograde ya dibuundu lenda ve kukutana na ntembe ya ngunga yayi. Mpe ya ke vwanda yimbi mingi. Biblia ke tuba, “Mutindu Jannès na Jambrès kuteleminaka Moïse, mutindu mosi bawu; bantu ya dibanza ya kuvweza, samu na Lukwikilu.” Bawu lendaka kaka kumekula Yawu kieleka.

<sup>80</sup> Moise kwendaka kuna na lutumu ya yandi ya Nzambi, na nkawa na diboko ya yandi. Mpe Nzambi tubaka, “Sala kidimbu yayi na ntwala ya bawu. Mpe kana bawu kuwa yawu ve, na yina sala kidimbu yayi na ntwala ya bawu. Mpe kana bawu kuwa yawu ve, na yina mu ke vwanda na nge, mu ke keba nyonso yankaka me bikana ya yawu.”

<sup>81</sup> Mbote, Moise kulumukaka na kidimbu ya yandi ya ntete. Mpe, kaka na ntangu yandi salaka kidimbu ya yandi ya ntete, ya vwandaka na bamekudi bisika nionso, yina vwandaka sala kima mutindu mosi. Kasi ata mbala mosi ve ti Moise swanaka samu na yawu. Yandi telamaka kaka swi, samu ti yandi zabaka ti ya vwandaka Nzambi yina fidisaka yandi. Beto ke kuzwa dyaka yawu kuvutukila na bilumbu ya nsuka, beno bambuka moyo. Beno me mona?

<sup>82</sup> Mpe mutindu ya beto ya retrograde ntangu yayi ke kutana ve na ntembe ya ngunga, kasi lufulu ya nene keke awa. Ya keke na ba-Pentecotiste mingi na yinza bubu yayi kulutula yina vwandaka ntete, yina beto zaba, bakwikidi ya ba-Pentecotiste mingi. Ya kieleka.

<sup>83</sup> Beno zaba, *The Sunday Visitor*, zulunale ya Katolika, zulunale ya Lumingo yina ba bokilaka *The Sunday Visitor*, Mu ke kwikila pene ya bamvula zole me luta, salaka nsamunu mosi mutindu yayi. Yandi tubaka, “Dibuundu ya kulutula nene ke na kukula na yinza keke ba-Pentecotiste.” Yandi tubaka, “Mvula me luta, dibuundu ya Katolika keke ya kusonika mafuku ya bantu, na Bukatolika.” Kasi yandi tubaka. . . Ya keke nyonso Katolisisme. Kasi yandi tubaka, “Dibuundu ya Pantekote kaka, na yawu mosi, na kubakaka mosi ya mafuku, bankama tanu ya mafunda.”

<sup>84</sup> Ntangu yayi lufulu keke kuna, kasi beto keke ve na ngolo yina beto kuzwaka ntangu beto vwandaka na diboko mosi. Nkonga nionso ya Samson vwandaka kuna, kasi wapi vwandaka Ngolo ya Mfumu? Yinga, systeme ya denomination ke siamisaka ve Ndinga ya Mfumu. Ya kieleka. Ntangu yayi beno tala.

<sup>85</sup> Mu vwandaka solula na nganga-Nzambi yina ke zingaka na nzila ya munu, dibuundu ya Santu.

<sup>86</sup> Pene ya ngonda mosi me luta, kubanda kubasika ya malu-malu yayi, mulongi ya Luther vwandaka na nganga-Nzambi ya dibuundu ya Katolika, Dibuundu ya Ntima ya Santu, ke longa na chaire ya yandi. Mpe nganga-Nzambi ya Katolika vwandaka na mulongi ya Luther na kutubaka misa samu na yandi. “Ke pesa chaire,” kitini ya nene na zulunale. Yinga. Kieleka. Oh, la la, kana muntu lenda mona yawu mpe ve. . . Kana beno lenda bakula yawu ve, mbote, beno keke—beno keke—beno keke kieleka ya kusungama na Masonuku. Beno me mona? Yinga.

<sup>87</sup> Mu solulaka na nganga-Nzambi yayi. Mpe yandi tubaka na munu, yandi tubaka, “Mu zola solula na nge, Tata Branham.”

Mu tubaka, “Mbote mingi.”

<sup>88</sup> Mpe yandi tubaka, “Nge botikaka mwana-kento yayi ya Frazier, na nkumbu ya Marie Elisabeth Frazier?”

Mu tubaka, “Yinga, tata, mu salaka yawu.”

Yandi tubaka, “Evêque zola nsamunu ya nge ya kusinie samu na yawu.”

Mu tubaka, “Mu me bakula ti—ti yandi balukaka Katolika.”

<sup>89</sup> Mpe yandi tubaka, “Yinga,” yandi tubaka, “yandi vutukaka na dibuundu ya mama.”

<sup>90</sup> Mpe mu tubaka, “Yinga, tata,” mu tubaka, “mama ya yandi vwandaka tuba na munu samu na yawu.”

Yandi tubaka, “Yinga, mama ya yandi bakaka yawu mbote ve.”

<sup>91</sup> Mu tubaka, “Yinga, mama ya yandi tubaka na munu ti yandi ‘ke zola mingi kutambula na yandi na ntoni.’” Mpe mu tubaka, “Ya kieleka, yawu yina yandi vwandaka sala.”

<sup>92</sup> Mpe na yina yandi tubaka, yandi tubaka, “Mu zola ti nge sinie nsamunu yayi.” Yandi tubaka, “Nge botikaka yandi? Wapi mutindu nge botikaka yandi?”

Mu tubaka, “Na mbotika ya Baklisto.”

<sup>93</sup> Mpe yandi tubaka, “Mu zola kutuba *wapi mutindu*, tata? Nge mwangisaka yandi maza, mwangisa, to kotisaka yandi na maza?”

Mu tubaka, “Mbotika ya Baklisto kele na kukotisa na maza.”

<sup>94</sup> “Uh-huh,” yandi tubaka, “mbote mingi.” Yandi tubaka, “Ntangu yayi, nge, nge kotisaka yandi na masa na Nkumbu ya Tata, Mwana, mpe Mpeve-Santu?”

<sup>95</sup> Mu tubaka, “Yinga, tata, ya kele Yesu Klisto, ya kele Nkumbu ya Tata, Mwana, mpe Mpeve-Santu. Ya kele mutindu mu—mu botikaka yandi.”

<sup>96</sup> Mpe yandi tubaka, “Nge botikaka yandi na Nkumbu ya Tata, Mwana, mpe Mpeve-Santu?”

<sup>97</sup> Mu tubaka, “Yinga, tata. Mu bokilaka bawu ata fioti ve bampova, ntangu yayi. Mu botikaka yandi na *Nkumbu* ya Tata, Mwana, mpe Mpeve-Santu, yina kele ‘Yesu Klisto.’”

<sup>98</sup> Yandi tubaka, “Yinga, tata, mu me mona,” mpe yandi tulaka yawu mutindu yina. Yandi tubaka, “Nge zaba, ya kele mutindu dibuundu ya ntete ya Katolika botikaka bawu.”

Mu tubaka, “Oh, ya kele kieleka?”

Mpe yandi tubaka, “Yinga, ya kele mutindu yina.”

Mu tubaka, “Yinki kusalamaka? ‘Bawu kimaka mbangu mbote.’”

<sup>99</sup> Mpe yandi tubaka, “Mbote,” yandi tubaka, “nge me mona,” yandi tubaka—tubaka, “nge ke kwikila Biblia. Nzambi kele na kati ya dibuundu ya Yandi.”

<sup>100</sup> Mu tubaka, “Nzambi kele na kati ya Ndinga ya Yandi, tata, Ndinga ya Yandi.” Mu tubaka, “Nge tubaka ti Pierre vwandaka pape ya ntete.”

Yandi tubaka, “Yandi vwandaka.”

<sup>101</sup> “Mbote,” mu tubaka, “na yina kana dibuundu ya Katolika fwana tuba nyonso ya yawu na—na Latin, mpe nyonso yankaka yina, kisika ya ke soba ve; na yina yinki pape ya ntete tubaka, na Actes 2:38, kisika wapi yandi tubaka, ‘Beno balula ntima mpe beno botama, mosi na mosi ya beno, na Nkumbu ya Yesu Klisto samu na mulemvo ya masumu.’”

Yandi tubaka, “Kana nge ke . . .”

Mu tubaka, “Na funguna yayi, mpe nionso yina,” mu tubaka.

<sup>102</sup> Yandi tubaka, “Mbote, Yesu tubaka ve na bilandi ya Yandi, ‘bayina nyonso yina beno ke lemvo kila masumu, na bawu ba ke lemvo kila bawu; bayina nionso beno ke kanga masumu, na bawu ba ke kanga yawu?’”

Mu tubaka, “Yandi salaka yawu.”

<sup>103</sup> “Na yina yinki ke tambula mbote ve na yawu? Biblia ya beno ya kieleka ke tuba na beno yawu.”

<sup>104</sup> Mu tubaka, “Na yina kana nge ke lemvo kila masumu mutindu ba ke lemvo kila bawu, mu ke kwenda na nge. Samu ti, ba yufulaka Pierre, yandi yina vwandaka na bafungula, ‘Yinki beto fwana sala samu na kuzwa mpulusu?’ Yandi tubaka, ‘Beno balula ntima, mosi na mosi ya beno, mpe beno botama na Nkumbu ya Yesu Klisto samu na mulemvo ya masumu ya beno.’ Ntangu yayi beno sala yawu mutindu yina, mpe mu ke kwenda na beno.” Amen. Ya kele Ndinga. Ya kele mutindu ya Nzambi ya kusala yawu. Bawu lembaka na zulu ya yawu. Ya kele . . .

Yandi tubaka, “Mbote, mbote, mu me kwisaka ata fioti ve na kuswana na nge.”

<sup>105</sup> Mu tubaka, “Nani vwandaka kuswana?” Beno me mona? Mu tubaka, “Ata mbala mosi ve. Mu ke na kuswana ve. Mu . . . nge me yufula munu kiuvu mosi, mpe mu me pesa mvutu na yawu na mutindu ya kulutila mbote yina mu zabaka.”

<sup>106</sup> Mu tubaka, “Mu ke yufula nge mosi.” Mu tubaka, “Nge tubaka ti . . . ti Nzambi vwandaka na dibuundu. Mpe ntangu yayi mu ke pesa beno ndandu ya kutuba na beno, Baklisto ya ntete, kana beno zola kubokila bawu Katolika, mbote mingi; Pierre, Jacques, Jean, Marc, Luc, mpe bawu nyonso, bawu, yinga.” Mu tubaka, “Na yina na kulandaka nzila ya Biblia yina bantumwa yayi sonikaka, ntangu yayi beno zola kutuba bubu yayi ti badiocèse ya beno ntangu yayi kele nene mingi kulutila yina ya vwandaka na ntangu yina, beno zaba ndwenga mingi? Mpe beno zaba mutindu ya kukeba . . .?”

“Yinga, tata. Ya kele kaka kieleka.”

<sup>107</sup> Mu tubaka, “Na yina samu na yinki ya vwandaka, ti ntangu ba landaka misiku ya Yesu Klisto, bawu vumbulaka bantu ya kufwa, bawu basisaka bampeve ya yimbi, bawu salaka mitindu

nyonso ya bidimbu mpe mambu ya ngitukulu, mpe beno ke sala yawu ve bubu yayi? Ntangu yayi yinki kele yimbi?”

<sup>108</sup> Kana dibuundu vwandaka ya kulutila mbote na nsungi ya Luther, to nsungi ya Wesley, to nsungi yankaka, kulutila yina ya vwandaka kuna, samu na yinki bawu salaka ve bisalu ya bawu kuna? Beno me mona? Beno me mona? Kieleka. Bawu vutukaka na Ndinga!

<sup>109</sup> Samson telemaka kuna, yandi katulaka bilele na yandi. Kasi, beno zaba, kima mosi vwandaka (mu zola sala nswalu) ba-Phillistin zabaka ve, na yina Samson vwandaka ya kutelama kuna na kubanzaka nionso yayi kuna.

<sup>110</sup> Mu ke zola kubaka yinza ya ba-Pentecotiste mpe kuvutula bawu na nsongi kisika mosi kuna, bika bawu banza mutindu yina na mwa ntangu fioti, beno banza kaka bima yayi ya kulutila mbote. Wapi kisika beto kele ntangu yayi na mayele ya nene ya organisation? Mosi ke telemaka mosi yankaka. Ba-Unitaire ke telemakaka ba-Binitaire, ba-Binitaire ba-Trinitaire, mpe nionso yina, nionso, kaka mutindu ya kele. Ya zolaka vwanza mutindu yina ve. Ya zolaka vwanza mutindu yina ve. Beto fwana vutuka, mpe kuvukana mpe kusukisa yawu na zulu ya lufulu ya MUTINDU ME TUBA MFUMU.

<sup>111</sup> Yinki kele diambu na bapofete na kati ya dibuundu? Ndinga ya Mfumu fwana kwisa na bapofete. Mpe kana profete yina ke tuba ti yandi kele profete, mpe ke manga Kieleka yayi na kati ya Biblia, landila Ndinga, yandi kele profete ve. Ntangu yayi, beto fwana kuzwa makabu yayi samu na kusungika beto, samu na kukeba beto na ndonga. Kasi kuna, na mutindu nyonso to yankaka, beto me kwenda ntama na yawu nyonso. Mpe bawu me telama, me vutuka manima na nsongi.

<sup>112</sup> Awa telemaka Samson, yina telemaka kuna na nsongi, yandi banzaka na nionso yina vwandaka. Mpe ba-Phillistin vwandaka ya kutelama kuna, na minduki ya bawu pene-pene ya bakento yayi, ba vwandaka tala na yisi, ba vwandaka kuluka mpe ya kulawuka malafu, mpe ke kembila lunungu na zulu ya kisadi ya Yehowa. Oh, la la, yina ke fidisa kima mosi ve na nzila ya beno, samu na kubanza na yawu, lunungu na zulu ya dikani ya Yehowa! Yinga, ba vwandaka ya kutelama kuna na nzambi-mbisi. Dagon vwandaka nzambi-mbisi. Mpe ba vwandaka kuyoka munkayulu. Ba bakaka baluzingu ya bantu, mwana mosi ya fioti zolaka kufwa samu na munkayulu, kulutisa mbele na kati ya yawu, na ntima ya yawu, samu na munkayulu. Mpe kuna bawu vwandaka, vwandaka sala mukembo ya nene yayi na zulu ya lunungu na zulu ya Yehowa.

<sup>113</sup> Mpe dibuundu na nkokila yayi, mutindu nkonga ya ba-Philistin, ke na kungenga na zulu ya dibanza yina Kimvuka ya Mabuundu, na manima ya mwa ntangu fyoti, ke kanga konso dibuundu yina kele ve ya yawu. Samson, kuzenga bansuki ya nge

ata fioti ve! Bikana kaka na Ndinga yina. Mu ke kipe ve yina ke salama, beno vwanda kaka kuna na Ndinga yina. Beno vukisa yawu ve.

<sup>114</sup> Samson bandaka na kubanza, “Mu ke kukiyufula kana ya fwana salama?” Ntangu yayi yandi tubaka, “Mu zaba ti nsuki ya munu me kula, kasi mu kele mpofu. Reveil yankaka lendaka vwanda. Ya lendaka vwanda.”

<sup>115</sup> Yandi tubaka na mwana-bakala ya fioti, “Tula maboko ya munu na zulu ya potu. Keti yayi kele bapoto yina me vwanda yinzo ya muvimba?”

“Yinga.”

“Mpe beno ke tuba bantinu nionso mpe bantu ya lukumu na zulu?”

“Yinga.”

<sup>116</sup> “Mu me lemba. Nge me sala, nge me sala munu bima mingi mpe bima! Nge zola tula maboko ya munu na zulu ya potu?”

<sup>117</sup> Mpe yandi tulaka maboko ya yandi na zulu ya potu, mpe yandi telemaka na kati-kati ya yawu, mu banza mutindu na ndonga *yayi*. Mpe yandi telemaka kuna na maboko ya yandi na zulu ya bapoto yina. Ba-Philistin, ke kembila mpe ke kuzwa ntangu mosi ya nene, bawu zimbanaka na kutala yandi mbote. Oh, la la!

<sup>118</sup> Kasi yandi bandaka na kubanza, “Nzambi kele kaka Nzambi. Mu zaba ti Yandi kele. Mu mekaka Yandi. Mu tulaka Yandi na kumekama. Mu zaba ti Yandi kele kaka Nzambi. Ya kele munu yina kele luvunu. Mu kele yandi yina sumukaka.” Bawu monaka ve masa ya meso yina vwandaka kulumuka na mabulu ya meso yayi ya mpofu, yina vwandaka kulumuka na kibefu ya yandi. Bawu talaka ve bikoba ya yandi kutambula. “Mfumumu, mu me sala yimbi. Bika mu kufwa na ba-Philistin.”

<sup>119</sup> Yandi zolaka Ndinga ya Nzambi yina monisamaka na ntuala ya Jezabel yina, kulutila yina yandi zolaka luzingu ya yandi mosi. Oh, kana nsatu yina lendaka kwisa diaka na yinzo-Nzambi! Yinga. Yandi vwandaka sambila ve samu na ntumunu ya malu-malu, denomination ya malu-malu, kasi ti Ndinga ya Nzambi zabana diaka; nsilulu yina yandi kuzwaka, lendaka vutuka dyaka na yandi. Yandi vwandaka ya kuzaba yina zolaka salama kana ba vutulaka kisambu ya yandi, kasi yandi vwandaka ya kukubama mpe ya kukwikama. Oh, kana dibuundu lendaka kaka kukuma mutindu yina! Na yina yandi bokaka!

<sup>120</sup> Na malembe yandi vwandaka sambila, “Ya lenda salama, Mfumumu. Ya lendaka salama. Mu me telama awa, makunzi ya munu nionso ya nene kele diaka kintwadi. Mu kele awa, bansuki ya munu me basika. Kasi mu lendaka mona diaka ve mutindu ya kubula bawu, samu meso ya munu kele mpofu. Mu lendaka mona ve kisika mu vwandaka kwenda. Kasi ya lenda salama ti—

ti Nge ke bika yawu kusalama diaka, Mfumu, samu na kulakisa ngolo ya Nge.”

Yandi bokaka, “Mbala mosi dyaka, Mfumu, mbala mosi dyaka!”

<sup>121</sup> Oh, kana dibuundu lendaka dila kaka yawu, “Mbala mosi dyaka, Mfumu, ti beto mona ngolo ya Nge!”

<sup>122</sup> “Mbala mosi dyaka!” Mpe mutindu yandi bokaka mpe yufulaka Nzambi, mu lenda mona misisa yango kubanda na kuvimba. Konso nsinga na nzutu ya yandi bandaka na kubaluka. Mpeve-Santu vwandaka kwisa na zulu ya yandi kuna. Yandi tandaka dyaka maboko ya yandi, na ngolo ya Mpeve-Santu na zulu ya yandi, na yisi yandi kwendaka na yinzo ya nene. Biblia ke tuba, “Yandi kufwaka kulutula kilumbu yina na yina yandi salaka bilumbu ya yandi nionso bikanaka.” Yandi lungisaka lutumu yina Nzambi pesaka yandi, kuna. “Mbala mosi diaka!”

<sup>123</sup> Ya ke vwandaka ntangu nyonso mutindu yina ntangu ngolo ya Nzambi ke kwiza, bansalulu ya nene ya ba-isme ke kubwaka. Samson kele lunungu ya kulutula nene na zulu ya mbeni ya yandi vwandaka na ntangu ya yandi ya nsuka.

<sup>124</sup> Ntangu yayi bika mu tuba mutindu yayi, samu na kumanisa. Pentecote, beto lenda telema na kisika ya ba-organisation yayi ya nene, beto lenda telama na poto ya Hollywood mpe bima nyonso yankaka yayi yina ke kabula beto na zola ya Nzambi ya kele na kati ya Klisto, mpe beto lenda telama kuna mpe kubalula ntima, mpe kuboka diaka, “Mfumu, mbala mosi dyaka sala beto pantekote! Mbala mosi dyaka, Mfumu, mbala mosi dyaka ke sala beto pantekote! Mbala mosi dyaka ke lakisa ngolo ya Nge na kati ya beto, Mfumu! Mbala mosi dyaka?”

<sup>125</sup> Beno kuwa, beno bebisa mbeni ya beno na ntwala mbeni ya beno bebisa beno. Yandi ke sala yawu. Beno vutula balukutakanu na mutindu ya ntama mpe kima mosi. Mpe, oh, bika Delila, bika yinza swi, kima yina ke benda beno na mwa bima yina beno lendaka sala ve. Mpe mwa bima, bampasi ke basika na dibuundu, mpe beno ke ndima ve kusemba samu ti beno fwana ve; beno lenda katukila dibuundu yankaka, mpe bima mutindu yina. Na bilumbu ya ntete, ntangu muntu vwandaka vukana ve na Ndinga ya Nzambi, ba basisaka yandi, ya kufwa.

<sup>126</sup> “Vutula beto na pantekote!” Ya kele ve dibanza ya Hollywood, kasi ntima ya muvimba ya kubaluka na Nzambi ya kele yina beto kele na yawu nsatu. “Mbala mosi dyaka, O Mfumu, mbala mosi dyaka!”

<sup>127</sup> Kana mu lendaka mona yawu kusalama, kana meso ya munu ya kulemba lendaka monana diaka mpe kumona dibuundu yango kuzimbana baluswaswanu ya yawu! Kana mu lendaka mona systeme yina ya denomination kubwa, mpe ke losa yawu mbala mosi na makulu ya Kimvuka, mpe ke tuba, “Beto zola

kima ve ya kusala na yawu! Beto ke pesa ve bukuluntu ya beto!” Kana mu lendaka mona ba-Trinitaire mpe ba-Unitaire, mpe bawu nionso, kuvukana mpe kutuba, “Bampangi, beto vutuka kisika beto bikaka Yandi. Beto vutuka na kisika yina beto bandaka na kuswana mosi na yankaka, beto vutuka kaka na zulu ya dilongi ya mbotika ya masa, mpe ke vutuka kaka mpe ke baka nzila ya Biblia samu na yawu,” mpe na manima ke dila, “Mbala mosi dyaka, Mfumu, mbala mosi dyaka!” Mpe beno kuzwa bansaka yayi nionso. . . mpe mingi ya bantu yayi na zulu ya estrade mpe bawu zaba mingi ve na yina me tala Nzambi kulutula lapin ke salaka na mapapa ya mvula-mpembe, mpe bakento yayi na ba-robe yayi ya kukangama mingi ti mpusu ya bawu kele na ngaanda, ke tambula na estrade, ke bula maboko ya bawu mpe ke dumuka mutindu yina, mutindu nkonga ya kulakisa to kima yankaka.

<sup>128</sup> “Nzambi, vutula beto na Mpeve-Santu mpe ngolo, mpe kumonisama ya Ndinga! Mbala mosi dyaka, Mfumu, mbala mosi dyaka!” Beno ke kwikila yawu? [Dibuundu me tuba, “Amen.”—Mu.] “Mfumu Nzambi, mbala mosi dyaka, bika mu mona Mvwandulu ya Yesu Klisto kutambula na dibuundu, bika mu mona ngolo ya Yandi mpe nsilulu ya Yandi me monisama na ntuala ya beto. Mbala mosi dyaka, Mfumu, mbala mosi dyaka! Nzambi, vwanda na kyadi, sadisa beto!”

<sup>129</sup> Beno me mona yina bima yayi yankaka ke nata beto? Ya ke kufwa kieleka. . . ya ke nata ntama nkadulu ya Klisto, na ngaanda ya dibuundu, na ngaanda ya—na ngaanda ya dibuundu, na ngaanda ya bantu. Beto fwana vwanda na mawa mingi kintwadi ti ya ke vwanda na kima mosi ve ke kabula beto na Ndinga yayi mpe zola ya beto samu na mosi na yankaka.

<sup>130</sup> Yesu Klisto kele awa. Yandi kele Tata ya beto. Yandi kele Mama ya beto. Yandi kele Munganga ya munu. Yandi kele Ntinu ya munu. Yandi kele Nzambi ya munu. Yandi kele Luzingu ya munu. Yandi kele kyese ya munu. Yandi kele ngemba ya munu. Nyonso yina kele, Yandi kele, samu na munu. Yandi kele nyonso ya munu. Yandi kele awa ntangu yayi.

<sup>131</sup> Yandi zola kuvutula dibuundu na kisika yina. Mu ke kukiyufula kana beto lendaka boka, “Mbala mosi diaka, Mfumu,” mpe bika masa ya meso ya kubalula ntima kukatuka na ba-ricketta ya beto ya kufwa meso? Kieleka mu ke na kuzonzaka ve na dibuundu yayi. Yayi ke na kubakamaka na bande, beno me mona, awa, yayi ke kwenda bisika nyonso na yinza. Bika ti—bika bantu ya beto kuvutuka dyaka na yawu, bika yawu vutuka dyaka na kisika yina beto lendaka bokila dyaka lukutakanu mutindu yina beto kuzwaka ntete.

<sup>132</sup> Beno baka kaka bamvula kumi to kumi na tanu, na manima, beno tala mutindu ya ke na kutuba kubanda kuna, beno tala mutindu ya me kulumuka, me kulumuka. Ya kele kaka nsoni



mingi, ti muntu mosi ke na nsoni, mingi, samu na kuzonzila kubeluka ya Kinzambi, ya vwandaka na nsoni mingi yina ba nataka na zulu ya yawu; ba zonzilaka na Mpeve-Santu, ntangu nsoni mingi kusalamaka na zulu ya Yawu. Ya kele kieleka. Ya kele ve foti ya Nzambi. Ya kele Samson yina me bika misiku ya Ndinga ya Nzambi, mpe me yingisaka kima yankaka, mpe kubika organisation kuzenga yandi bansuki, kuvuna yandi na kati ya yawu.

<sup>133</sup> Mu ke tuba na nge, mpangi ya munu ya bakala, mpangi ya kento, kana mu mona dyaka nge ve na lweka yayi ya—ya Kiti ya nene ya Lufundusu ya Nzambi, “Yesu Klisto kele mutindu mosi mazono, bubu yayi, mpe kukonda nsuka.” Ndinga ya Yandi, samu na munu, kele Luzingu. Yandi kele awa ntangu yayi. Beno ke kwikila yawu? [Dibuundu me tuba, “Amen.”—Mu.] Mu zaba ti Yandi kele awa.

<sup>134</sup> Mpe kima mosi kaka beno fwana sala, kuzaba ti Yandi kele awa, kele kuvwanda beno mosi na nzila. Beno me mona? Ntangu nyonso yina beno kele na nzila, na yina Nzambi lenda sala kima ve samu na beno. Ntangu beno ke banza mabanza ya beno, na yina mabanza ya Nzambi kele na siansi ve. Kasi kana beno bika mabanza ya beno, mpe beno banza mabanza ya Yandi! “Mabanza ya munu kele ve mabanza ya nge,” Yandi tubaka. “Kana ya kele na lukumu, kana ya kele na ngolo, beno banza na bima yayi.” Ve yina dibuundu mosi ke tuba samu na yawu, kasi yina Nzambi tubaka samu na yawu!

<sup>135</sup> Mutindu mwa mama yayi ya kulala awa, yina vwandaka ningana na mbeto yayi. Kento yina ke vwanda mutindu yina luzingu ya yandi nionso, kana ti yandi lenda kuzwa lukwikilu ya yandi—ya yandi kuvwanda kaka mbala mosi na Yesu Klisto. Mpe ata yina ke kwisa to ke kwenda, ya ke monisama na yandi, na yina ya kele ve na kima mosi ke kanga kubeluka ya nzutu. Ya kele kieleka. Kasi ntangu beno ke kuzwa ya beno. . . Ya ke tala na yina beno ke na kubanza.

<sup>136</sup> Kana beno ke kwikila kaka mpe beno ke vwanda na lukwikilu, Nzambi lenda sala kima mosi samu na beno. Mpe kima ya kulutila nene yina Yandi lenda sala samu na beno, na nkokila yayi, ke vutula kaka moyo ya beno na Mvwandulu ya Moyo ya Yandi. Kaka kuna na manima kisika muntu nyonso na kati awa. . .

<sup>137</sup> Beno banza kaka, yinki kana Mpeve-Santu kuzwaka muntu nionso awa na muvimba na yisi ya luyalu ya Yandi? Beno banza na yina zolaka salama na nkokila yayi, beno banza yina zolaka salama na Shreveport na ntangu yayi mbasi na nkokila! Ba zolaka vwanda na bayintu ya muvimba bisika nionso, “Nkonga ya bantu vwandaka kuma bilawu. Ba vwandaka belusa bambevo mpe vwandaka vumbula bantu ya kufwa. Ba ke sala mitindu nyonso ya bima na Shreveport, na Louisiane, na Etats-

Unis, U.S.A.” Bawu zolaka kuzwa yawu na televizyo, ya yina bawu vwandaka sala, kana Mpeve-Santu zolaka baka luyalu ya muvimba.

<sup>138</sup> Samu na yinki Yandi ve? Yandi zola. Yandi zola. Yandi ke na kuvingila. “Mbote,” beno ke tuba, “Mu me yufula Yandi bima mingi, mu ke zolaka ve kuyufula Yandi mingi.” Beno lomba ya kulutila mingi, ti kiese ya beno ke vwanda ya kufuluka!

<sup>139</sup> Beno lendaka banza ti mwa mbisi ya fioti, kati-kati ya centimetre mosi ya yinda, kuna na kati-kati ya Pacifique, na kutubaka, “Mu ke sala mbote na kunwa maza yayi na bukebi nyonso, mu lendaka kondwa yawu, kilumbu mosi”? Beno lendaka banza na mwa mpuku mosi ya fioti nene mutindu *yayi*, na kati ya bibumbulu ya nene ya Egypte, beno banza, “Mu ke na muswa ya mbuma mosi na kilumbu, samu mu lendaka kondwa yawu na ntwala ya kuyonzika yina ke kwisa”? Oh, la la! Ntangu yayi beno kabula yawu na nkama ya byazi, mpe ya kele mutindu ya kukondwa mpasi beno lenda kumanisa kyadi ya Nzambi mpe lemvo mpe ngolo na beno, kana beno ke kwikila yawu kaka, beno lenda kwenda beno mosi. . . Mbote, beno lemvokila munu ti mu. . . ya zola kutuba beno lenda ve kumanisa Yandi.

<sup>140</sup> Yandi kele yinto ya masa ya Luzingu ya Kukonda nsuka, awa na nkokila yayi samu na kutalisa nsilulu ya Kinzambi ya Biblia ya Yandi, na muntu nyonso yina ke kwikila Yawu. Amen. Yinga, tata. Kima mosi kaka beno ke sala kele kunwa. Beno kwisa na yinto ya masa mpe beno kunwa. Beno kunwa tii kuna beno ke sepela. Beno lenda ve kumanisa Yandi. Ve, tata. Yandi kele kieleka yina ke manaka ve, mpe beno lenda kunwa mpe kunwa mpe kunwa. Beno lenda kunwa kubeluka ya beno. Beno lenda kunwa mpulusu ya beno. Beno kwiza kaka mpe kunwa. “Ti yandi yina kele na mpwila kukwiza mpe kunwa.” Amen. Mu—mu—mu zaba ti Yandi kele awa, mpe mu zaba ti Yandi ke sala ya kulutila, ya kulutila mingi kana beto ke bika kaka Yandi kusala yawu.

<sup>141</sup> Mu me monaka kaka kima mosi kusalama. Mpe mu—mu zola ve kubanda mosi ya balukutakanu yina, beno me mona, ya bawision, samu ti mu—mu ke na kuzonzila kima yankaka. Beno me mona, mu ke tubila beno na kukwisa, samu na kubeluka ya nzutu ve, kasi kukwisa na—na. . . Kaka na ntangu bawu ke sala yawu, ntangu yayi ya kele kaka. . . Beno me mona, kaka na ntangu mu ke kwenda na kupema munu mosi kuna, samu na kukwenda, kima ya ntete beno zaba, bantu simbaka, beno zaba, beno ke kuwa yawu kukota.

<sup>142</sup> Awa, mu lenda tuba na nge. Bakala yina kele ya kuvwanda na manima kuna, na mwana-nkazi ya yandi na luketo yina ya yimbi. Kana yandi ke kwikila, Nzambi ke belusa yandi mpe ke kumisa yandi mbote. Nge ke kwikila ti Yandi ke belusa yandi mpe ke kumisa yandi mbote? [Mpangi-bakala me tuba, “Amen.”—Mu.]

Kana beno sala yawu, mbote na yina Nzambi ke sala yawu. Beno me mona? Ya kieleka kaka. Amen.

<sup>143</sup> Awa kele na bakala mosi ya kuvwanda awa, yina ke na kutalaka munu. Yandi ke na kusambilaka samu na dibuta ya yandi. Yandi me katuka awa ve. Yandi me katuka na Caroline du Sud. Tata Dixon. Kasi kana yandi ke kwikila kaka na ntima ya yandi ya muovimba, Nzambi ke pesa lusakumunu yina na yandi. Nge ke kwikila yawu, tata? Mu kele nzenza ya muovimba samu na yandi. Mu me monaka yandi ata fioti ve, na luzingu ya munu. Amen. Mu me monaka yandi ata fioti ve, na luzingu ya munu.

<sup>144</sup> Kasi beno me mona yina mu zola kutuba? Yinki ya kele? “Wapi mutindu ya kisalu yina, Mpangi Branham?” Ntangu Mpangi Branham lenda basika na nzila! Yinga, tata. Ntangu mu lenda basika na nzila, na yina Yesu Klisto ke kota.

<sup>145</sup> Kaka na nzila, mbala mosi na yandi, ya kele na muntu yankaka yina simbaka Tiya, mpe yandi me katuka na Caroline du Sud, mpe. Ya kele kieleka. Mu ke mona Yawu kukangama na zulu ya yandi. Ya kele kaka kieleka. Yandi ke sambila samu na mpangi-bakala yina kele kinwa-malafu. Ya kele kaka kieleka. Beno kuwa. Nge kele Mpangi Holmes. Nge ke kwikila ti Nzambi. . . Yina kele nkumbu ya nge? Nzambi ke salaka. . . Nzambi ke pesa yawu na nge.

Beno me mona yina mu zola kutuba? “Mbala mosi dyaka, Mfumu, mbala mosi dyaka!”

<sup>146</sup> Beto telama, beto nionso. Beno boka, Pentecotiste, beno telemisa maboko ya beno, “Mbala mosi dyaka, Mfumu! Mbala mosi dyaka, Mfumu, mbala mosi dyaka!” Alleluia! Mu zaba ve yinki ya kusala, kasi Yawu kele awa. Beto boka, na ntima mosi, “Mbala mosi dyaka, Mfumu!” Beno boka yawu, “Mbala mosi dyaka, Mfumu! Mbala mosi dyaka, Mfumu! Mbala mosi dyaka, Mfumu, fidisa Ngolo ya Nge, fidisa balusakumunu ya Nge. Fidisa Mpeve-Santu na zulu ya beto, mutindu mupepe ya ngolo, mpe fulusa konso moyo yina kele na kati awa, ya malu-malu.” Nkembo na Nzambi! Kwikila yawu na ntima ya nge ya muovimba. “Mbala mosi diaka, Mfumu, mbala mosi diaka!” Alleluia!

<sup>147</sup> Ya kukola na Mpeve! Kana Mpeve-Santu lenda kaka kutiamuka na kati ya beno tii kuna beno ke vwanda ya kulawuka mingi ti beno ke zimbana yina nkumbu ya beno kele, tii beno ke zimbana bantembe ya beno nionso; beno ke lawuka mingi na Mpeve tii kuna beno ke zimbana bantembe ya beno, amen, na yina beno lenda kuma kisika mosi na Nzambi. Na yina kuboka, “mbala mosi dyaka,” ke basika na bukieleka, mpe dyaka mosi yankaka. Alleluia! Ya kufuluka na Mpeve-Santu, bayayi ya kukola na Mpeve; Ludedomo ya Nzambi mpe busantu, mpe ngolo, beno kulawuka mingi ti beno zimbana nani beno kele. Beno kele kima ve, na kubanda. Beno bambuka moyo, Nzambi

zola kota na kati ya beno. “Mbala mosi dyaka, Mfumu, mbala mosi dyaka! Mbala mosi dyaka, Mfumu, mbala mosi dyaka!”

<sup>148</sup> Oh, ba-Pentecotiste, ba-Pentecotiste, beno kwenda mbangu samu na luzingu ya beno! Ya kele kaka na mwa ntangu me bikana. Ntangu me luta mingi ti beno ke banza. Kana mu tuba ata mbala mosi ve dyambu yankaka na chaire yayi, beno bambuka moyo, beno kima na luzingu ya beno! Ntangu me luta mingi ti beno ke banza. Mu ke kuwa Mpeve-Santu na zulu ya munu, kutuba, “Tuba yawu diaka.” Beno kwenda mbangu samu na luzingu ya beno! Ntangu me luta mingi ti beno ke banza.

<sup>149</sup> Mbala mosi dyaka, Mfumu, mbala mosi fulusa Life Tabernacle na Luzingu ya Kukonda nsuka, konso mambele na kati awa. Mpe ti Nkembo ya Mfumu kubwa na zulu ya dibuundu yayi, Mfumu Yesu. Alleluia! Alleluia! Mu ke kwikila na Nzambi. Mbala mosi dyaka, Mfumu, ti dyaka muntu zimbana nani bawu kele. Ti muntu zimbana kukondwa lukwikilu ya yandi, ti beto lenda dila, “Mbala mosi dyaka, Mfumu, mbala mosi dyaka!”

Beno zola Yandi? [Dibuundu me tuba, “Amen.”—Mu.]

<sup>150</sup> O Nzambi, Tata ya Mazulu, pesa beto reveil na myoyo ya beto, Mfumu. Beto ke mona minda na mulinga, Tiya na zulu ya autel ke na kubasika. O Mfumu Nzambi, tala na yinsi yina ba me singaka, kasi, Mfumu, kuzimbana ve bantu ya Nge. Bantu awa me nwana bamvula mingi, Mfumu, samu na kutunga mwa ekonomi yayi samu na Nge. Ba tungaka Life Tabernacle, Mfumu, samu na mipepe ya mpulusu, samu na reveil. O Nzambi, mbala mosi dyaka tiamuna Ngolo ya Nge ya Santu na kati ya yawu. Ke zinga konso mambele, ke katula baluswaswanu nionso. Fidisa mvula ya Tiya ya Santu ya Nzambi mpe pesa nsemu na myoyo ya beto, Mfumu, na Mvwandulu ya Yesu Klisto. Bika ti bantu kuvwanda ve ya kudinda mingi na kati ya kukondwa lukwikilu, ti bawu lenda mona ti Nge kele awa na beto; mpe Nge kele Ndinga, mpe Mufundisi ya mabanza ya ntima, mutindu Biblia me siamisama mingi na beto, mpe mbala mosi dyaka. Mfumu Nzambi, bika beto vumbuka na ba-sense ya beto, ya Mpeve ya Nzambi na kuvwandaka na kati-kati ya beto. Pesa yawu, Tata. Mu me pesa yawu na Nge, na munu mosi. Amen.

<sup>151</sup> Mpangi-bakala, mpangi-kento, mu zaba ve, na kati ya Biblia ya munu, ya kima nyonso yankaka yina Nzambi silaka na kusala na ntuala ya Enlevement ya Dibuundu. Mu ve. Beno ke na kubanza na kidimbu ya kibulu, yina ke na kwiza; mu me tuba na beno, ya kele, bawu me sala yawu. Beno me mona? Kima yina ke landa kele samu na Enlevement ya Dibuundu. Ya lendaka kwisa na konso ntangu yina, mpe kukondwa kubebisa ndambu ya Disonuku mosi na kati ya Biblia, na mutindu mu zaba yawu. Nzambi zaba ti ya kele kieleka. Yinga, tata. Ntangu me kuma pene-pene. Ntangu me luta mingi ti beto ke banza.

<sup>152</sup> Beto kanga meso ya beto, mpe beto yimbila, *Mu Zola Yandi*. Mu banza, kana beto ke sambila mpe ke kumisa Yandi, mu banza ti Yandi ke sala kima mosi. Mu sambilaka sabala nyonso yayi, samu na kumona kukabuka na tabernacle yayi. Mu sambilaka ntete mu kwiza awa. Mu kele na bantu yina ke sambilaka samu na yayi. Oh, ya—ya kele na kisambu yina ke kwenda samu na yayi. Mu ke meka na kukwikila na ntima ya munu ya muvimba. Beto vumbuka, na nswalu nionso. Beto sambila kaka Yandi mpe beto kumisa Yandi, na yina beto ke yimba yawu ntangu yayi na meso ya beto ya kukangama mpe maboko ya beto na Nzambi.

Mu zola Yandi, mu zola Yandi  
Samu Yandi zolaka munu ntete  
Mpe futaka mpulusu ya munu  
Na yinti ya Calvaire.

<sup>153</sup> Ntangu yayi na yina beto ke yimba nzila yina ke landa, beno pesana mbote na muntu na nzila ya beno, mpangi ya beno ya bakala ya Muklisto, tuba, “Nzambi sakumuna nge,” ntangu yayi na yina beto ke yimba yawu.

mu zola Yandi, mu . . .

Kana beno zola mosi na yankaka, beno lenda ve kubumba na Nzambi ya luzolo.


Samu ti Yandi ntete . . .

. . .? . . .

. . . mpulusu  
Na Calvaire . . .

<sup>154</sup> Ntangu yayi beto tuba, “Alleluia!” “Alleluia!” Tuba yawu diaka, “Alleluia!” Diaka, “Alleluia!” Lukumu na Nzambi ya beto!

Mu zola Yandi, mu zola Yandi  
Samu . . .

Mpangi Don, nge me kubama? 

63-1201E Kaka Mbala Mosi Dyaka, Mfumu  
Life Tabernacle  
Shreveport, Louisiane U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso keke ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)